

PROJEKT LIGJ

Nr. _____, date ____2024

PËR PRODHIMIN BIOLOGJIK, ETIKETIMIN E PRODUKTEVE BIOLOGJIKE DHE KONTROLLIN E TYRE¹

Në mbështetje të neneve 78 dhe 83, pika 1, të Kushtetutës, me propozimin e Këshillit të Ministrave,

K U V E N D I

I REPUBLIKËS SË SHQIPËRISË

V E N D O S I:

KREU I

DISPOZITA TË PËRGJITHSHME

Neni 1

Qëllimi

Qëllimi i këtij ligji është të përcaktojë parimet dhe rregullat për prodhimin biologjik, lidhur me certifikimin dhe përdorimin e treguesve që i referohen prodhimit biologjik në etiketim dhe reklama, dhe rregullat për kontrollin përveç sa parashikohet në legjislacionin në fuqi për ushqimin dhe kontrollet zyrtare për ushqimin dhe ushqimin për kafshë.

Neni 2

Fusha e zbatimit

1. Ky ligj zbatohet për produktet me origjinë nga bujqësia, përfshirë akuakulturën, bletarinë dhe produktet e prejardhura prej tyre, kur këto produkte prodhohen, ose synohen të prodhohen, përgatiten, etiketohen, shpërndahen, vendosen në treg dhe importohen ose eksportohen, si më poshtë:

¹Ky ligj është përafshuar pjesërisht me Rregulloren (KE) 2018/848 e Parlamentit Evropian dhe e Këshillit e datës 30 maj 2018 për prodhimin organik dhe etiketimin e produkteve organike dhe shfuqizimin e Rregullores së Këshillit (KE) nr. 834/2007. Numri CELEX: 32018R0848, Fletorja Zyrtare e Bashkimit Evropian, Seria L 150, Dt.14.6.2018, faqe. 1–92.

- a. produkte bujqësore të gjalla ose të papërpunuara, përfshirë farat dhe materiale të tjera mbjellëse dhe shumëzuese bimore;
 - b. produkte bujqësore të përpunuara për t'u përdorur si ushqim;
 - c. ushqime për kafshë;
 - d. produkte të tjera të lidhura ngushtë me bujqësinë, nëse ato prodhohen ose synohen të prodhohen, përgatiten, etiketohen, shpërndahen, vendosen në treg, importohen ose eksportohen, të përcaktuara me urdhër të ministrit.
2. Ky ligj zbatohet për çdo operator të përfshirë në çdo fazë të prodhimit, përgatitjes dhe shpërndarjes të produkteve biologjike të përcaktuara në pikën 1 të këtij neni.
 3. Ky ligj nuk zbatohet për aktivitetet e kateringut të kryera nga një operator kateringut të përcaktuar në legjislacionin në fuqi për etiketimin e ushqimeve dhe informimin e konsumatorit.
 4. Ky ligj zbatohet pa cenuar dispozitat ligjore në fuqi për sigurinë ushqimore në gjithë zinxhirin ushqimor, shëndetin dhe mirëqenien e kafshëve, shëndetin e bimëve dhe materialin mbjellës dhe shumëzues bimor, me përjashtim të rasteve kur parashikohet ndryshe nga ky ligj.
 5. Ky ligj zbatohet pa cenuar dispozitat e legjislacionit në fuqi për vendosjen e produkteve bujqësore në treg si dhe etiketimin e ushqimeve dhe informimin e konsumatorit.
 6. Produktet biologjike të prodhuara dhe përgatitura në Shqipëri dhe që synohen të vendosen në tregun shqiptar, certifikohen sipas rregullave të këtij ligji.

Neni 3

Përkufizime

Në këtë ligj termat e mëposhtëm kanë këto kuptime:

1. “Aditiv ushqimor” ka kuptimin e dhënë në ligjin për ushqimin.
2. “Aditiv ushqimor për ushqim për kafshë” janë substanca, mikroorganizma ose preparate, por jo lëndët e para për ushqimet për kafshë dhe as përzierjet paraprake të tyre, të cilat iu shtohen qëllimisht ushqimeve për kafshë ose ujit për të kryer, në veçanti, një ose më shumë nga funksionet e mëposhtme:
 - a. të ndikojë në përmirësimin e vetive të ushqimeve për kafshë,
 - b. të ndikojë në përmirësimin e karakteristikave të produkteve shtazore,
 - c. të ndikojë në përmirësimin e ngjyrës së peshqve dhe shpendëve ornamentalë,
 - d. të plotësojnë nevojat ushqyese të kafshëve,
 - e. të ndikojë në përmirësimin e ndikimit mjedisor të prodhimit shtazor,
 - f. të ndikojë në përmirësimin e prodhimit shtazor, gjendjen e përgjithshme ose mirëqenien e kafshëve, duke ndikuar sidomos florën gastro-intestinale ose tretshmërinë e ushqimeve për kafshë, ose
 - g. të kenë efekt kokciostatik ose histomonostatik.

3. "Akuakulturë" ka kuptimin e dhënë në ligjin për akuakulturën.
4. "Autoriteti kompetent", është:
 - a) ministria;
 - b) sipas rastit, autoritetet përkatëse të vendeve të Bashkimit Evropian ose të një vendi të tretë;
5. "Autoriteti i kontrollit organik" në vijim AKU, është institucioni përgjegjës për kontrollin zyrtar të ushqimit dhe ushqimit për kafshë, i cili kryen kontrollin e zbatimit të kërkesave të këtij ligji në treg dhe importit të produkteve biologjike.
6. "Bimë" ka kuptimin e dhënë në ligjin për për mbrojtjen e bimëve,
7. "Bimë mëmë" është një bimë e identifikuar, nga e cila është marrë material mbjellës dhe shumëzues bimor për të riprodhuar bimë të reja.
8. "Brezni" është një grup bimësh të cilat i përkasin një stadi të vetëm në vijën e prejardhjes së bimëve.
9. "Çertifikatë zyrtare" është një dokument në letër ose elektronik i nënshkruar nga zyrtari certifikues dhe që ofron siguri në lidhje me përputhshmërinë me kërkesat e përcaktuara në këtë ligj.
10. "Cikli i prodhimit" është jetëgjatësia e një kafshe akuakulture ose alge, nga faza më e hershme e jetës vezët e fekunduara, në rastin e kafshëve të akuakulturës, deri në mbledhjen e prodhimit;
11. "Dëmtues" ka kuptimin e dhënë në ligjin për për mbrojtjen e bimëve.,
12. "Ekuivalencë" është plotësimi i objektivave dhe parimeve të njëjta duke zbatuar rregulla të cilat sigurojnë të njëjtën nivel sigurie të përputhshmërisë;
13. "Etiketim" ka kuptimin e dhënë në ligjin për ushqimin.
14. "Fazë e prodhimit, e përgatitjes dhe e shpërndarjes" është çdo fazë, që nga prodhimi primar i një produkti biologjik dhe ruajtja, përpunimi, transporti e deri te shitja ose furnizimi te konsumatori i fundit, ku përfshihen, nëse është e nevojshme, etiketimi, reklamimi, importi, eksporti dhe nënkontraktimet.
15. "Fermë" është tërësia e të gjitha njësive prodhuese që veprojnë nën një menaxhim të vetëm me synim prodhimin e produkteve bujqësore të gjalla ose të papërpunuara, përfshirë produktet nga akuakultura dhe bletaria, me përjashtim të vajit esencial dhe majas.
16. "Fermer" është një individ ose subjekt juridik, ose një grup individësh ose persona juridikë, të cilët, pavarësisht nga forma e organizimit e atij grupi dhe anëtarëve të tij sipas ligjeshlacionit në fuqi, ushtrojnë një aktivitet bujqësor.
17. "Gjurmueshmëria" ka kuptimin e dhënë në ligjin për ushqimin.
18. "Integritet i produkteve biologjike ose në kalim" është fakti që produkti nuk shfaq mospërputhje e cila:
 - a) çënon në çdo fazë të prodhimit, përgatitjes dhe shpërndarjes karakteristikat e produktit biologjike ose në kalim;
 - b) është e përsëritur ose e qëllimshme.

19. "I prodhuar me OMGJ" është produkti i prodhuar duke përdorur një OMGJ si organizëm i fundit i gjallë në procesin e prodhimit, por që nuk përmban ose përbëhet nga OMGJ dhe as është i prodhuar nga OMGJ-të;
20. "I prodhuar nga OMGJ" është produkt i prodhuar tërësisht ose pjesërisht nga OMGJ, por që nuk përmban ose përbëhet nga OMGJ.
21. "Kalim" është faza e ndërmjetme e kalimit nga prodhimi jo biologjik në atë biologjik brenda një periudhe të caktuar, gjatë së cilës zbatohen kërkesat e këtij ligji.
22. "Lëndë ndihmëse për përpunimin" është çdo substancë e cila:
 - a) Në ushqim:
 - (i) nuk konsumohet si ushqim në vetvete;
 - (ii) përdoret qëllimisht në përpunimin e lëndëve të para, ushqimeve ose përbërësve të tyre, për të arritur një qëllim të caktuar teknologjik gjatë trajtimit ose përpunimit; dhe
 - (iii) mund të rezultojë në praninë e paqëllimshme, por teknikisht të pashmangshëm në produktin përfundimtar të mbetjeve të kësaj substance ose derivateve të saj, me kusht që ato të mos paraqesin ndonjë rrezik për shëndetin dhe të mos kenë asnjë efekt teknologjik në produktin përfundimtar;
 - b). Në ushqimin për kafshë:
 - i) nuk konsumohet si ushqim për kafshë në vetvete, por përdoret qëllimisht në përpunimin e produkteve ushqimore ose ushqimeve për kafshë për të arritur një qëllim teknologjik gjatë trajtimit ose përpunimit, i cili mund të rezultojë në praninë e paqëllimshme, por teknologjikisht të pashmangshme të mbetjeve të kësaj substance ose të derivateve të saj në produktin përfundimtar, me kusht që këto mbetje të mos kenë efekt negativ në shëndetin e kafshëve, të njerëzve ose në mjedis dhe të mos kenë asnjë efekt teknologjik në ushqimin për kafshë përfundimtar;
23. "Masa parandaluese" janë masat që merren nga operatorët në çdo fazë të prodhimit, përgatitjes dhe shpërndarjes, për të siguruar ruajtjen e biodiversitetit dhe cilësisë së tokës, parandaluar dhe luftuar sëmundjet dhe dëmtuesit dhe për të shmangur ndikimet negative në mjedis, në shëndetin e kafshëve dhe bimëve.
24. "Masa paraprake" janë masat që merren nga operatorët në të gjitha fazat e prodhimit, përgatitjes dhe shpërndarjes për të shmangur ndotjen me produkte ose substanca, të cilat nuk lejohen të përdoren në prodhimin biologjik dhe për të shmangur shkëmbimin e produkteve biologjike me produkte jo biologjike.
25. "Material biologjik heterogjen" është një grupim bimësh që i përket një kategorie taksonomike të vetme botanike të rangut më të ulët të njohur të cilat:
 - a) shfaqin karakteristika të përbashkëta fenotipike;
 - b) karakterizohen nga një shkallë e lartë diversiteti gjenetik dhe fenotipik mes njësive individuale riprodhuese, në mënyrë që ky grupim bimësh të përfaqësohet nga materiali si një e tërë dhe jo nga një numër i vogël bimësh;
 - c) nuk është një varietet,
 - d) nuk është një përzierje varietetesh; dhe

- e) është prodhuar në përputhje me këtë ligj;
26. "Material mbjellës dhe shumëzues bimor" janë bimët dhe gjithë pjesët e bimëve, përfshirë farat, në çdo fazë të rritjes, të cilat janë të afta dhe kultivohen me qëllim, për të prodhuar sërish bimë.
 27. "Ministria" është Ministria përgjegjëse për bujqësinë.
 28. "Ministri" është Ministri përgjegjës për bujqësinë.
 29. "Mospërputhje" është mungesa e përputhjes me kërkesat e këtij ligji;
 30. "Njësi prodhimi" është tërësia e gjithë objekteve të një ferme, si vendet ku kryhet prodhimi primar, ngastrat e tokës, kullotat, hapësirat në natyrë, stallat e blegtorisë ose pjesë të tyre, zgjoje, pellgje peshku, impiante kultivimi për alga ose kafshë akuakulture, njësitë e rritjes së tyre, objekte në bregdet ose në det dhe mjediset për ruajtjen e bimëve, produkteve bimore, produkteve nga algat, produkteve shtazore, lëndëve të para dhe çdo inputi tjetër të rëndësishëm të menaxhuar siç përshkruhet në pikat 42, 43 dhe 44, të këtij neni.
 31. "Njësi prodhimi biologjik" është një njësi prodhimi, përjashtuar periudhën e kalimit, e cila menaxhohet në përputhje me kërkesat që zbatohen për prodhimin biologjik.
 32. "Njësi prodhimi në kalim" është një njësi prodhimi gjatë periudhës së kalimit sipas nenit 10, e cila menaxhohet në përputhje me kërkesat që zbatohen për prodhimin biologjik. Ajo mund të përbëhet nga ngastra toke ose nga objekte të tjera për të cilat periudha e kalimit, fillon në momente të ndryshme kohore.
 33. "Njësi prodhimi jo biologjik" është një njësi prodhimi e cila nuk menaxhohet në përputhje me kërkesat që zbatohen për prodhimin biologjik.
 34. "Operator" është një person fizik ose juridik përgjegjës për të garantuar që ky ligj zbatohet në të gjitha fazat e prodhimit, përgatitjes dhe shpërndarjes të cilat janë nën kontrollin e tij.
 35. "Organizëm i modifikuar gjenetikisht (OMGJ)" ka kuptimin e dhënë në ligjin për ushqimin.
 36. "Përbërës" ka kuptimin e dhënë në ligjin për ushqimin.
 37. "Përgatitje" janë proceset e konservimit ose përpunimit të produkteve biologjike ose në kalim, ose çdo proces/veprim tjetër që kryhet mbi një produkt të papërpunuar pa ndryshuar produktin fillestar si therja, prerja, pastrimi, grirja apo bluarja, si dhe ambalazhimi, etiketimi ose ndryshimet e bëra në etiketimin që i referohen prodhimit biologjik;
 38. "Përpunim" ka kuptimin e dhënë në ligjin për ushqimin.
 39. "Prodhim bimor" është prodhimi i produkteve bujqësore, përfshirë mbledhjen e produkteve nga bimët e egra për qëllime tregtare.
 40. "Prodhim biologjik" është zbatimi i metodave të prodhimit në përputhje me rregullat e përcaktuara në këtë ligj në të gjitha fazat e prodhimit, përgatitjes dhe shpërndarjes, përfshirë periudhën e kalimit.
 41. "Prodhim blegtoral" është prodhimi i kafshëve tokësore shtëpiake ose të zbutura, përfshirë insektet;
 42. "Produkt bimor" ka kuptimin e dhënë në ligjin për mbrojtjen e bimëve.

43. "Produkt biologjik" është produkti i cili përftohet nga prodhimi biologjik, por jo gjatë periudhës së kalimit duke përjashtuar produktet e gjuetisë ose peshkimit të kafshëve të egra.
44. "Produkt në kalim" është një produkt i prodhuar gjatë periudhës së kalimit siç përcaktohet në nenin 10, të këtij ligji;
45. "Produkte për mbrojtjen e bimëve ose PMB" ka kuptimin e dhënë në ligjin për mbrojtjen e bimëve.
46. "Produkte të papërpunuara" janë produkte ushqimore, të cilat, pavarësisht se janë ambalazhuar dhe etiketuar, nuk i janë nënshtruar përpunimit, përfshirë produktet që janë ndarë, hequr kockat, grirë, hequr lëkura, copëtuar, prerë, pastruar, fijejuar, bluar, vendosur në ftohje, në ngrirje, në ngrirje të thellë ose shkrirë;
47. "Produkte të përpunuara" janë produkte ushqimore të cilat rezultojnë nga përpunimi i produkteve të papërpunuara, pavarësisht nga proceset e ambalazhimit dhe etiketimit. Këto produkte mund të përmbajnë përbërës që janë të nevojshëm për prodhimin e tyre ose për t'u dhënë karakteristika specifike.
48. "Reklamë" është çdo paraqitje e produkteve për konsumatorin, me çdo mjet të ndryshëm nga etiketimi, që synon ose mund të ndikojë dhe të përcaktojë qëndrimet, bindjet dhe reagimet për të nxitur drejtpërdrejt ose tërthorazi shitjen e produkteve;
49. "Rrezatim jonizues" është transferimi i energjisë në formën e grimcave elementare ose valëve elektromagnetike me gjatësi vale 100 nanometër ose më pak ose me frekuencë 3×10^{15} Hertz ose më shumë, i aftë të prodhojë jone drejtpërdrejt ose tërthorazi.
50. "Trupë e kontrollit", është person juridik privat, vendase apo e huaj, e cila kryen inspektimin dhe certifikimin në fushën e prodhimit biologjik, në përputhje me kërkesat e përcaktuara në këtë ligj ose një trupë kontrolli e njohur nga komisioni evropian ose që vepron në një vënd të tretë të njohur nga komisioni evropian, për qëllim të kryerjes së kontrollit në vendet e treta për importin e produkteve biologjike ose në kalim në Bashkimin Evropian.
51. "Ushqim" ka kuptimin e dhënë në ligjin për ushqimin.
52. "Ushqim i paraambalazhuar, ka kuptimin e dhënë në ligjin për ushqimin.
53. "Ushqim për kafshë" ka kuptimin e dhënë në legjislacionin në fuqi për ushqimin për kafshë.
54. "Varietet" është një grup bimësh brenda një kategorie të vetme taksonomike botanike të rangut më të ulët të njohur, grup i cili, pavarësisht nëse plotëson kushtet për t'u quajtur varietet bimor mund:
 - a) të përcaktohet nga shfaqja e karakteristikave të cilat vijnë nga një gjenotip i caktuar ose nga kombinimi i disa gjenotipeve,
 - b) të dallohet nga çfarëdo grupim tjetër bimësh për nga shfaqja e të paktën njërit prej tipareve të përmendura, dhe konsiderohet si njësi sa i përket përshtatshmërisë së saj për t'u shumëzuar pa u ndryshuar.
55. "Varietet biologjik i përshtatshëm për prodhim biologjik" është një varietet i cili:

- a) karakterizohet nga një shkallë e lartë diversiteti gjenetik dhe fenotipik midis njësive të veçanta riprodhuese; dhe
 - b) është përftuar nga përmirësimi gjenetik biologjik;
56. "Vendosje në treg" ka kuptimin e dhënë në ligjin për ushqimin.

KREU II

OBJEKTIVAT DHE PARIMET E PRODHIMIT BIOLOGJIK

Neni 4

Objektivat e përgjithshme të prodhimit biologjik

1. Objektivat e përgjithshme për prodhimin biologjik janë:
 - a. të kontribuojë për mbrojtjen e mjedisit dhe klimës;
 - b. të ruajë pjellorinë afatgjatë të tokës;
 - c. të kontribuojë për një nivel të lartë biodiversiteti;
 - d. të kontribuojë në mënyrë të qëndrueshme për një mjedis jo toksik;
 - e. të kontribuojë për standarde të larta të mirëqenies së kafshëve dhe në veçanti, të plotësojë nevojat e vecanta jetësore sipas specieve të kafshëve;
 - f. të nxisë kanalet dhe zinxhirin e shkurtër të shpërndarjes dhe prodhimit lokal në zona të ndryshme të vendit;
 - g. të nxisë ruajtjen e racave të rralla dhe autoktone në rrezik zhdukjeje;
 - h. të kontribuojë në zhvillimin e furnizimit të materialit gjenetik bimor të përshtatur ndaj kërkesave dhe objektivave të vecanta të bujqësisë biologjike;
 - i. të kontribuojë dhëndihmojë për një nivel të lartë biodiversiteti, në vecanti duke përdorur materiale gjenetike bimore të larmishme, të tilla si material biologjik heterogjen dhe varietete biologjike të përshtatshme për prodhimin biologjik;
 - j. të nxisë zhvillimin e aktiviteteteve për përmirësimin gjenetik të bimëve që prodhohen sipas metodës së prodhimit biologjik, për të kontribuar për perspektiva ekonomike të favorshme të sektorit biologjik.

Neni 5

Parimet e përgjithshme të prodhimit biologjik

1. Prodhimi biologjik është një sistem i qëndrueshëm menaxhimi që bazohet në parimet e përgjithshme si më poshtë:
 - a. respektimi i sistemeve dhe cikleve natyrore dhe ruajtja dhe përmirësimi i gjendjes së tokës, ujit dhe ajrit, shëndetit të bimëve dhe të kafshëve dhe ekuilibrit midis tyre;
 - b. ruajtja e elementeve të peizazhit natyror, sic janë zonat ose vendet e trashëgimisë natyrore;

- c. përdorimi i përgjegjshëm i energjisë dhe burimeve natyrore sic janë uji, toka, lënda organike dhe ajri;
- d. prodhimi i një shumëllojshmërie ushqimi me cilësi të lartë dhe i produkteve të tjera bujqësore dhe të akuakulturës që i përgjigjen kërkesave të konsumatorëve për produkte ushqimore të prodhuara nga procese të cilat nuk dëmtojnë mjedisin, shëndetin e njeriut, shëndetin e bimëve apo shëndetin dhe mirëqenien e kafshëve;
- e. sigurimi i integritetit të prodhimit biologjik në të gjitha fazat e prodhimit, përgatitjes dhe shpërndarjes së ushqimit dhe ushqimit për kafshë;
- f. projektimi dhe menaxhimi i duhur i proceseve biologjike, bazuar në sistemet ekologjike si dhe duke përdorur burime natyrore të brendshme të sistemit të menaxhimit, me metoda të cilat:
 - i. përdorin organizma të gjalla dhe metoda mekanike të prodhimit;
 - ii. praktikojnë kultivimin e bimëve në tokë dhe prodhimin blegtoral të lidhur me tokën, ose akuakulturë që përputhet me parimin e shfrytëzimit të qëndrueshëm të burimeve ujore;
 - iii. përjashtojnë përdorimin e OMGJ-ve, produkteve të përftuara nga OMGJ-të dhe produkteve të prodhuara me OMGJ-të, përveç produkteve mjekësore veterinare;
 - iv. bazohen në vlerësimin e riskut dhe, kur është e përshtatshme ose sipas rastit, në përdorimin e masave paraprake dhe masave parandaluese;
- g. kufizimi i përdorimit të inputeve nga jashtë fermës, kur inputet nga jashtë janë të nevojshme ose kur nuk ekzistojnë praktikrat dhe metodat e duhura të menaxhimit sipas shkronjës f, të kësaj pike, inputet nga jashtë kufizohen në:
 - i. inputet nga prodhimi biologjik, për materialin riprodhues bimor u jepet përparësi varieteteve të përzgjedhura/seleksionuara për aftësinë e tyre për t'iu përgjigjur nevojave dhe objektivave specifike të bujqësisë biologjike;
 - ii. substanca natyrore ose me prejardhje nga substanca natyrore;
 - iii. plehra minerale me tretshmëri të ulët;
- h. përshtatja e procesit të prodhimit, ku është e nevojshme dhe brenda kuadrit të këtij ligji, duke marrë parasysh gjendjen shëndetësore, ndryshimet rajonale në ekuilibrin ekologjik, kushtet lokale dhe klimatike, fazat e zhvillimit dhe praktikrat e veçanta të mbarështimit të blegtorisë;
- i. përjashtimi nga gjithë zinxhiri ushqimor biologjik i klonimit të kafshëve, i rritjes së kafshëve poliploide të induktuara artificialisht dhe i rrezatimit jonizues;
- j. mbajtja e një niveli të lartë të mirëqenies së kafshëve duke respektuar nevojat e veçanta të specieve.

Neni 6

Parimet e veçanta në aktivitetet bujqësore dhe akuakulturës

1. Prodhimi biologjik në aktivitetet bujqësore dhe të akuakulturës, bazohet në parimet e veçanta si më poshtë:
 - a. ruajtja dhe rritja e aktivitetit jetësor dhe pjellorisë natyrore të tokës, qëndrueshmërisë së tokës, kapacitetit mbajtës ujqor dhe biodiversitetit të saj, duke parandaluar dhe luftuar varfërimin në lëndë organike, ngjeshjen dhe gërryerjen e tokës, dhe të ushqyerit e bimëve kryesisht përmes ekosistemit të tokës;
 - b. kufizimi në minimum i përdorimit të burimeve të pa ripërritëshme dhe inputeve të jashtme;
 - c. riciklimi i mbetjeve dhe i nënprodukteve me origjinë bimore dhe shtazore si inpute për prodhimin bimor dhe shtazor;
 - d. mbikëqyrja e shëndetit të bimëve me masa parandaluese, në veçanti zgjedhja e specieve, varieteteve ose e materialit mbjellës dhe shumëzues heterogjen të qëndrueshëm ndaj dëmtuesve dhe sëmundjeve, qarkullimet e duhura bujqësore, metodat mekanike dhe fizike dhe mbrojtja e armiqve natyrorë të dëmtuesve;
 - e. përdorimi i farave dhe kafshëve me shkallë të lartë diversiteti gjenetik, qëndrueshmërie ndaj sëmundjeve dhe jetëgjatësisë;
 - f. në zgjedhjen e varieteteve të bimëve, mbahen parasysh veçoritë e çdo sistemi prodhimi biologjik, duke u përqendruar tek rezultatet agronomike, qëndrueshmëria ndaj sëmundjeve, përshtatja ndaj kushteve të ndryshme pedo-klimatike lokale dhe respektimi i pengesave natyrore për kryqëzimet gjenetike;
 - g. përdorimi i materialit bimor mbjellës dhe shumëzues biologjik, si material mbjellës dhe shumëzues bimor biologjik heterogjen dhe i varieteteve biologjike të përshtatshme për prodhim biologjik;
 - h. prodhimi i varieteteve biologjike duke shfrytëzuar aftësitë riprodhuese natyrore dhe duke i kushtuar vëmendje pengesave natyrore të kryqëzimit të tyre;
 - i. mundësia që fermerët të përdorin material mbjellës dhe shumëzues bimor nga fermat e tyre për të shtuar burimet gjenetike të përshtatura ndaj kushteve të veçanta të prodhimit biologjik;
 - j. në zgjedhjen e racave të kafshëve, mbahet parasysh shkalla e lartë e diversitetit gjenetik, aftësia e kafshëve për t'iu përshtatur kushteve lokale, aftësia riprodhuese, jetëgjatësia, vitaliteti dhe qëndrueshmëria e tyre ndaj sëmundjeve apo problemeve shëndetësore;
 - k. zbatimi i praktikave të prodhimit blegtoral në përshtatje me terrenin dhe të lidhura me tokën.

- l. zbatimi i praktikave zooteknike të cilat forcojnë sistemin imunitar dhe shtojnë mbrojtjet natyrore kundër sëmundjeve, përfshirë ushtrimet e rregullta fizike dhe qasjen jashtë në natyrë dhe në kullota;
- m. ushqyerja e kafshëve me ushqime biologjike me përbërës bujqësorë të prodhuar nga prodhimi biologjik dhe nga substanca natyrore jo bujqësore;
- n. prodhimi biologjik shtazor nga kafshë të cilat janë rritur në ferma biologjike gjatë gjithë jetës së tyre, qysh nga lindja apo kllonitja;
- o. ruajtja e vazhdueshme e mjedisit ujqor të shëndetshëm dhe e cilësisë së ekosistemeve ujore dhe tokësore përreth;
- p. ushqyerja e organizmave ujorë me ushqime për kafshë nga peshkimi i qëndrueshëm ose me ushqime biologjike për kafshë nga përbërës bujqësorë nga prodhimi biologjik, përfshirë nga akuakultura biologjike dhe substanca natyrore jo bujqësore.
- q. shmangia e krijimit të ndonjë rreziku për speciet e mbrojtura që mund të lindë nga prodhimi biologjik.

Neni 7

Parimet e veçanta në përpunimin e ushqimeve biologjike

1. Prodhimi i ushqimeve biologjike të përpunuara bazohet, në parimet e veçanta në vijim:
 - a. prodhimi i ushqimeve biologjike nga përbërës që vijnë nga bujqësia biologjike;
 - b. kufizimi i përdorimit të lëndëve shtesë ushqimore, i përbërësve jo biologjikë me funksione kryesisht teknologjike dhe shije, si dhe i mikroelementeve dhe lëndëve ndihmëse për përpunim, në mënyrë që të përdoren në sasi minimale dhe vetëm në raste nevojë të domosdoshme teknologjike ose për qëllime të veçanta ushqyese;
 - c. përjashtimi i substancave dhe metodave përpunuese të cilat mund të keqinformojnë lidhur me natyrën e vërtetë të produktit;
 - d. përpunimi me kujdes i ushqimeve biologjike, duke i dhënë përparësi përdorimit të metodave biologjike, mekanike dhe fizike;
 - e. përjashtimi i ushqimeve që përmbajnë, ose përbëhen nga nanomateriale të prodhuara artificialisht.

Neni 8

Parimet në përpunimin e ushqimeve biologjike për kafshë

Prodhimi i ushqimeve biologjike të përpunuara për kafshë bazohet në parimet e veçanta në vijim:

- a. prodhimi i ushqimeve biologjike për kafshë nga lëndë e parë për ushqime biologjike për kafshë;
- b. kufizimi i përdorimit të shtesave ushqimore dhe lëndëve ndihmëse për përpunimin e ushqimeve për kafshë në sasi minimale dhe vetëm në raste nevojë të domosdoshme teknologjike ose zooteknike ose për qëllime të veçanta të ushqyerit;

- c. përjashtimi i substancave dhe i metodave të përpunimit që mund të keqinformojnë për natyrën e vërtetë të produktit;
- d. përpunimi i ushqimeve biologjike për kafshë, duke iu dhënë përparësi metodave biologjike, mekanike dhe fizike.

KREU III

RREGULLAT E PRODHIMIT

Neni 9

Rregullat e përgjithshme të prodhimit

1. Operatorët që përfshihen në prodhimin biologjik plotësojnë rregullat e përgjithshme të prodhimit të përcaktuara në këtë nen.
2. E gjithë ferma menaxhohet në përputhje me kërkesat e këtij ligji që zbatohen për prodhimin biologjik.
3. Në prodhimin biologjik përdoren vetëm produktet dhe substancat e përcaktuara në nenin 22,23 dhe 24 të këtij ligji, me kusht që përdorimi i tyre në prodhimin jo biologjik, të jetë miratuar sipas legjislacionit në fuqi për produktet e mbrojtjes së bimëve dhe produktet plehëruese.
4. Në prodhimin biologjik, përdoren edhe produktet dhe substancat e mëposhtme, me kusht që të jenë miratuar sipas legjislacionit në fuqi për produktet për mbrojtjen e bimëve:
 - a. mbrojtësit, sinergjikët dhe bashkë-formulesit, në përmbajtje të PMB-ve,
 - b. ndihmësit të cilët përzihen me produktet për mbrojtjen e bimëve.
5. Në prodhimin biologjik bimor lejohet përdorimi i produkteve dhe substancave bujqësore të tjera nga ato të përcaktuara në nenin 22 të këtij ligji, me kusht që përdorimi i tyre të jetë në përputhje me parimet e përcaktuara në kreun II të këtij ligji.
6. Rrezatimi jonizues nuk përdoret në trajtimin e ushqimeve biologjike, ushqimeve biologjike për kafshë dhe lëndëve të para që përdoren në prodhimin e tyre.
7. Ndalohet përdorimi i klonimit të kafshëve dhe rritja e kafshëve poliploide të induktuara artificialisht.
8. Në çdo fazë të prodhimit, përgatitjes dhe shpërndarjes merren masa parandaluese dhe paraprake kur është e nevojshme siç përcaktohet në nenin 27 të këtij ligji.
9. Ferma, pavarësisht parashikimeve të pikës 2 të këtij neni, ndahet në njësi prodhimi të veçuara qartësisht dhe efektivisht, për prodhim biologjik, në kalim dhe jo biologjik, me kusht që për njësitë e prodhimit jo biologjik:
 - a. për kafshët të përdoren specie të ndryshme;
 - b. për bimët të përdoren varietete të ndryshme dhe lehtësisht të dallueshme.

Këto kërkesa nuk zbatohen për qendrat kërkimore dhe të formimit profesional, fidanishtet bimore, fermat e shumëzimit të farave dhe në përmirësimin gjenetik.

10. Për algat dhe kafshët e akuakulturës, përfshihen të njëjtat specie, me kusht që të ketë një ndarje të qartë dhe efektive midis proceseve ose njësive të prodhimit.
11. Në përjashtim të shkronjës b) të pikës 9, të këtij neni, në rastin e kulturave shumëvjeçare që kërkojnë një periudhë kultivimi prej të paktën tre vjet, mund të përdoren varietete të ndryshme që nuk dallohen lehtësisht, apo të njëjtat varietete, me kusht që prodhimi në fjalë të përfshihet në një plan kalimi dhe kalimi në prodhim biologjik i pjesës së fundit të sipërfaqes së prodhimit të fillojë sa më shpejt të jetë e mundur dhe të përfundojë maksimumi brenda pesë viteve.
12. Në rastet e parashikuara në pikën 11 të këtij neni:
 - a. fermeri njofton të paktën 48 orë përpara, trupën e kontrollit për fillimin e vjeljes së çdo produkti në fjalë;
 - b. pas përfundimit të vjeljes, fermeri njofton trupën e kontrollit për sasinë e faktike të vjela nga njësitet në fjalë dhe masat e marra për veçimin e produkteve;
 - c. plani i kalimit dhe masat që duhet të merren për të siguruar veçimin efektiv dhe të dukshëm, konfirmohen çdo vit, nga trupa e kontrollit pas fillimit të planit të kalimit.
13. Në rastet e përcaktuara në pikat 9, 10, 11, dhe 12, kur jo të gjitha njësitet e prodhimit të një ferme menaxhohen sipas rregullave të prodhimit biologjik, operatorët:
 - a. mbajnë produktet dhe substancat e përdorura për njësitet e prodhimit biologjik dhe ato në kalim të ndara nga ato të përdorura për njësitet e prodhimit jo biologjik;
 - b. mbajnë të ndara nga njëra-tjetra produktet e prodhuara në njësitet e prodhimit biologjik, nga ato në kalim dhe jo biologjike;
 - c. mbajnë të dhënat e duhura për të treguar ndarjen efektive të njësive të prodhimit dhe të produkteve.
14. Rregulla të tjera për ndarjen e njësive të prodhimit biologjik brenda fermës, në kalim dhe jo biologjik, në veçanti lidhur me produktet e përcaktuara në shkronjën d), të pikës 1 të nenit 2 të këtij ligji, miratohen me udhëzim të ministrit.

Neni 10

Periudha e kalimit

1. Fermeri dhe operatori që prodhon alga ose kafshë të akuakulturës plotëson një periudhë kalimi. Gjatë gjithë periudhës së kalimit zbatohen të gjitha rregullat e prodhimit biologjik të përcaktuara në këtë nen dhe nenet 12, 13, 14, 15, 16, 17 dhe 18.
2. Periudha e kalimit fillon në datën e kërkesës për regjistrim të aktivitetit, që fermeri ose operatori i cili prodhon algat ose kafshët e akuakulturës, paraqet në përputhje me pikën 1, të nenit 34 të këtij ligji.
3. Asnjë periudhë e mëparshme nuk mund të njihet në mënyrë prapavepruese si pjesë e periudhës së kalimit, përveç rasteve kur:
 - a. parcelat e tokës së fermerit ose operatorit kanë qenë objekt i masave të përcaktuara në Programin e Zhvillimit Rural për të garantuar se në këto parcela toke nuk janë

- përdorur produkte apo substanca përveç atyre që përdoren në prodhimin biologjik; ose;
- b. fermeri ose operatori provon se parcelat e tokës kanë qenë zona natyrore ose bujqësore, të cilat, për një periudhë të paktën tre vjeçare, nuk kanë qenë trajtuar me produkte apo substanca që nuk lejohen të përdoren në prodhimin biologjik.
4. Produktet e prodhuara gjatë periudhës së kalimit nuk tregtohen si produkte biologjike ose në kalim. Produktet e mëposhtme të prodhuara gjatë periudhës së kalimit dhe në përputhje me pikën 1 të këtij neni, tregtohen si produkte në kalim, vetëm në këto raste:
- a. materiali mbjellës dhe shumëzues bimor, me kusht që të jetë plotësuar një periudhë kalimi të paktën 12 muaj;
 - b. produktet ushqimore dhe ushqimet për kafshë me origjinë bimore, me kusht që këto produkte të përmbajnë vetëm një përbërës bujqësor dhe të jetë plotësuar një periudhë kalimi të paktën 12 muaj përpara korrijës, vjeljes apo mbledhjes.
5. Rregulla të hollësishme për kalimin për specie të ndryshme nga ato të përcaktuara në pikën 3, të nenit 14 të këtij ligji si dhe dokumentet e veçanta që duhet të paraqiten për njohjen prapavepruese të një periudhe të mëparshme kalimi, miratohen me udhëzim të ministrit.

Neni 11

Ndalimi i përdorimit të OMGJ

1. OMGJ-të dhe produktet e prodhuara nga ose me OMGJ, nuk përdoren në ushqim ose ushqim për kafshë, ose si ushqim, ushqim për kafshë, lëndë ndihmëse në përpunim, produkte për mbrojtjen e bimëve, produkte plehëruese, përmirësues të tokës, material mbjellës dhe shumëzues bimor, mikroorganizma ose kafshë në prodhimin biologjik.
2. Për OMGJ-të dhe produktet e prodhuara nga OMGJ-të për ushqim dhe ushqim për kafshë, operatorët bazohen në etiketat apo në dokumentet e tjera shoqëruese të produktit sipas legjislacionit në fuqi për gjurmueshmërinë dhe etiketimin e OMGJ –ve dhe gjurmueshmërinë e produkteve ushqimore dhe ushqimit për kafshë, të prodhuara nga OMGJ-të.
3. Operatori konsideron se asnjë OMGJ dhe produkt i prodhuar nga OMGJ-të nuk është përdorur për prodhimin ose përpunimin e produkteve ushqimore dhe ushqimit për kafshë të blera, nga një etiketë ose dokument shoqërues përveç kur ata kanë dijeni që etiketimi i produkteve në fjalë nuk është në përputhje me legjislacionin në fuqi për ushqimin.
4. Operatori, për produktet që nuk janë ushqim ose ushqim për kafshë, apo produktet e prodhuara nga OMGJ, kur përdor produkte të tilla jobiologjike të blera nga palë të tjera, i kërkon shitësit t'i vërtetojë se ato produkte nuk janë prodhuar nga ose me OMGJ.

Neni 12

Rregullat për prodhimin biologjik bimor

1. Operatori që prodhon bimë ose produkte bimore biologjike, përveç rregullave të përgjithshme të prodhimit të përcaktuara në nenet 9, 10 dhe 11 të këtij ligji, zbatojnë edhe rregullat e përcaktuara në këtë nen.
2. Kulturat bujqësore biologjike, përveç atyre që kultivohen natyralisht në ujë, prodhohen në tokë, ose në tokë të plehëruar me produkte dhe substanca të lejuara për përdorim në prodhimin biologjik, në varësi të përbërjes së tokës dhe shkëmbit amnor.
3. Ndalohet prodhimi hidroponik, i cili është një metodë e kultivimit të bimëve të cilat nuk rriten në mënyrë natyrore në ujë me rrënjët vetëm në një tretësirë ushqyese ose në një mjedis inert të cilit i shtohet një tretësirë ushqyese.
4. Të gjitha teknikat e kultivimit të bimëve të përdorura, parandalojnë ose zvogëlojnë çdo ndotje të mundshme të mjedisit.
5. Për prodhimin e bimëve dhe produkteve biologjike bimore përveç materialit mbjellës dhe shumëzues bimor, përdoret vetëm material mbjellës dhe shumëzues bimor biologjik.
6. Për të prodhuar material mbjellës dhe shumëzues bimor biologjik, që përdoret për prodhimin e produkteve biologjike bimore përjashtuar materialin mbjellës dhe shumëzues bimor, bima mëmë dhe ku është e nevojshme, bimë të tjera që përdoren për prodhimin e materialit mbjellës dhe shumëzues bimor prodhohen në përputhje me kërkesat e këtij ligji për të paktën një brezni bimore, ose, në rastin e kulturave shumëvjeçare, për të paktën një brezni gjatë dy sezoneve të rritjes.
7. Gjatë zgjedhjes së materialit mbjellës dhe shumëzues bimor biologjik, operatori jep përparësi materialit mbjellës dhe shumëzues bimor biologjik të përshtatshëm për bujqësinë biologjike.
8. Për prodhimin e varieteteve biologjike të përshtatshme për prodhim biologjik, aktivitetet e përmirësimit gjenetik biologjik kryhen në kushte biologjike dhe synojnë rritjen e diversitetit gjenetik, mbështetur në aftësinë natyrore riprodhuese, karakteristikat agronomike, qëndrueshmërinë ndaj sëmundjeve dhe dëmtuese dhe në përshtatjen ndaj kushteve të ndryshme lokale të tokës dhe klimës.
9. Të gjitha praktikatat e shumëzimit përveç asaj me kultura meristemmatike kryhen sipas rregullave të certifikimit biologjik.
10. Rregulla të hollësishme për prodhimin e produkteve biologjike bimore, materialit mbjellës dhe shumëzues bimor, mbledhjen e bimëve të egra dhe prodhimin e kërpudhave, si dhe mbajtjen e detyrueshme të të dhënave, miratohen me udhëzim ministri.

Neni 13

Kërkesat për tregtimin e materialit mbjellës dhe shumëzues bimor të materialit biologjik heterogjen

1. Materiali mbjellës dhe shumëzues bimor i materialit biologjik heterogjen tregtohet pa plotësuar kërkesat për regjistrim dhe certifikim sipas kategorive të materialit parabazë, bazë dhe të

certifikuar apo kërkesat për t'u vendosur në kategori të tjera të përcaktuara në legjislacionin në fuqi për materialin mbjellës dhe shumëzues bimor.

2. Furnizuesi tregton materialin mbjellës dhe shumëzues bimor biologjik heterogjen pas regjistrimit online të tij pranë institucionit përgjegjës për farat dhe fidanet duke paraqitur informacionin si më poshtë:
 - a. detajet e kontaktit të kërkuarit;
 - b. speciet dhe emërtimin e materialit biologjik heterogjen;
 - c. përshkrimin e karakteristikave kryesore agronomike dhe fenotipike që janë të përbashkëta për këtë grupim bimor, përfshirë metodat e përmirësimit gjenetik, rezultatet e disponueshme nga testimi për këto karakteristika, vendin e prodhimit dhe materialin prindëror të përdorur;
 - d. një vetëdeklarim nga kërkuari lidhur me vërtetësinë e të dhënave në shkronjat a), b) dhe c) të kësaj pike, dhe
 - e. një mostër përfaqësuese.
3. Institucioni përgjegjës për farat dhe fidanet, shqyrton kërkesën, në përputhje me Kodin e Procedurave Administrative dhe brenda 3 muajve nga data e marrjes së kërkesës, kur nuk është kërkuar informacion shtesë ose nuk është refuzuar zyrtarisht për mosplotësim të informacionit ose mospërputhje me përcaktimin në pikën 25 të nenit 3, jep vendimin e tij për pranimin e kërkesës dhe kryen regjistrimin në regjistrin përkatës.
4. Regjistrimi i materialit mbjellës shumëzues bimor heterogjen biologjik, është pa pagesë.
5. Rregulla të hollësishme për prodhimin dhe tregtimin e materialit mbjellës dhe shumëzues bimor heterogjen biologjik, përcaktohen me udhëzim të ministrit.

Neni 14

Rregullat për prodhimin blegtoral

1. Operatori i prodhimit blegtoral, përveç rregullave të përgjithshme të prodhimit të përcaktuara në nenet 9, 10 dhe 11 të këtij ligji, plotëson edhe rregullat e përcaktuara në këtë nen.
2. Ndalohet prodhimi blegtoral pa tokë, ku fermeri që synon të prodhojë kafshë biologjike nuk administron ose disponon tokë bujqësore dhe nuk ka lidhur një marrëveshje bashkëpunimi me shkrim me një fermer për përdorimin e njësive të prodhimit biologjik ose në kalim për kafshë, me përjashtim të rasteve të bletarisë.
3. Rregulla të hollësishme për prodhimin biologjik blegtoral, si dhe mbajtja e detyrueshme e të dhënave, miratohen me udhëzim të ministrit.

Neni 15

Rregullat e prodhimit për algat dhe kafshët në akuakulturë

1. Operatori që prodhon alga dhe kafshë të akuakulturës biologjike, përveç rregullave të përgjithshme të prodhimit të përcaktuara në nenet 9, 10 dhe 11 të këtij ligji, plotësojnë edhe rregullat e përcaktuara në këtë nen.
2. Prodhimi kryhet në mjedise që nuk mund të ndoten me produkte ose substanca të palejuara për t'u përdorur në prodhimin biologjik, ose me lëndë ndotëse që çënojnë natyrën biologjike të produkteve.
3. Njësitë e prodhimit biologjik dhe jo biologjik ndahen në mënyrë të përshtatshme në përputhje me distancat minimale të ndarjes. Masat e tilla të ndarjes bazohen në vendodhjen natyrore, sistemet e ndara të shpërndarjes së ujit, distancat, rrjedhën e baticës dhe vendndodhjen e sipërme dhe të poshtme të njësisë së prodhimit organik.
4. Prodhimi i algave dhe akuakulturës nuk konsiderohet biologjik kur kryhet në vende ose zona të papërshtatshme për aktivitete të tilla, të përcaktuara sipas legjislacionit në fuqi për akuakulturen.
5. Rregulla të hollësishme për prodhimin e algave dhe kafshëve të akuakulturës, biologjike, përcaktohen me udhëzim të ministrit.

Neni 16

Rregullat e prodhimit të ushqimeve të përpunuara biologjike

1. Operatori që prodhon ushqim të përpunuar biologjik, përveç rregullave të përgjithshme të prodhimit të përcaktuara në nenet 9, 10 dhe 11 të këtij ligji, plotëson edhe rregullat e përcaktuara në këtë nen.
2. Përgatitja e produkteve të përpunuara biologjike, në kalim dhe jo biologjike kryhen të ndara nga njëra-tjetra në kohë dhe hapësirë. Kur në njësinë e përgatitjes, përgatiten ose ruhen produkte biologjike, në kalim dhe jo biologjike, operatori:
 - a. njofton trupën e kontrollit;
 - b. kryen proceset në vazhdimësi deri në përfundimin e prodhimit të produktit, të ndara në hapësirë dhe në kohë nga proceset e ngjashme që kryhen për produktin tjetër biologjik, në kalim ose jo biologjik;
 - c. ruan produktet biologjike, në kalim dhe jo biologjike, para dhe pas proceseve të prodhimit, të ndara nga njëra-tjetra në hapësirë dhe në kohë;
 - d. mban një regjistër të përditësuar për të gjitha proceset dhe sasitë e përpunuara;

- e. merr masat e nevojshme për të siguruar identifikimin e loteve dhe për të shmangur përzierjet ose shkëmbimet midis produkteve biologjike, në kalim dhe jo biologjike.
 - f. kryen proceset e prodhimit të produkteve biologjike ose në kalim, vetëm pas pastrimit të duhur të pajisjeve të prodhimit.
3. Nuk lejohet të përdoren produkte, substanca e teknika për të rivendosur cilësitë e humbura gjatë përpunimit dhe ruajtjes së ushqimit biologjik, që korrigjojnë pakujdesitë gjatë përpunimit apo që mund të keqinformojnë për natyrën e vërtetë të këtyre produkteve që tregtohen si ushqime biologjike.
 4. Në prodhimin biologjik të verës, zbatohet legjislacioni në fuqi për vreshtarinë dhe verën, me përjashtim të rasteve kur parashikohet ndryshe në këtë ligj dhe produktet e verës prodhohen nga lëndë e parë biologjike.
 5. Në prodhimin e produkteve ushqimore të përpunuara biologjike, nuk përdoren substanca aromatizuese ose preparate aromatizuese, të cilat nuk janë “natyrale” as “biologjike”.
 6. Rregullat e hollësishme, për prodhimin e produkteve ushqimore të përpunuara biologjike dhe teknikat e lejuara në përpunim, prodhimin e produkteve biologjike të verës si dhe mbajtja e detyrueshme e të dhënave, miratohen me udhëzim të ministrit.

Neni 17

Rregullat e prodhimit të ushqimeve për kafshë të përpunuara

1. Operatori që prodhon ushqim për kafshë të përpunuar, përveç rregullave të përgjithshme të prodhimit të përcaktuara në nenet 9, 10 dhe 11 të këtij ligji, plotëson edhe rregullat e përcaktuara në këtë nen.
2. Përgatitja e ushqimeve për kafshë të përpunuara biologjike, në kalim dhe jo biologjike, kryhet e ndarë në kohë dhe në hapësira të ndryshme. Kur në njësinë e përgatitjes, përgatiten ose ruhen ushqime për kafshë të përpunuara biologjike, në kalim dhe jo biologjike, operatori:
 - a. njofton trupën e kontrollit;
 - b. kryen proceset në vazhdimësi deri në përfundimin e prodhimit, të ndara në hapësirë ose në kohë nga proceset e ngjashme që kryhen për çdo produkt tjetër (biologjik, në kalim ose jo biologjik);
 - c. ruan produktet biologjike, në kalim dhe jo biologjike, para dhe pas proceseve të prodhimit, të ndara nga njëra-tjetra në hapësirë dhe në kohë;
 - d. mban një regjistër të përditësuar për të gjitha proceset e prodhimit dhe sasitë e përpunuara;
 - e. merr masat e nevojshme për të siguruar identifikimin e loteve dhe për të shmangur përzierjet ose shkëmbimet midis produkteve biologjike, në kalim dhe jo biologjike;
 - f. kryen proceset e prodhimit të produkteve biologjike ose në kalim, pas pastrimit të duhur të pajisjeve të prodhimit.

3. Rregullat e hollësishme për prodhimin e ushqimit për kafshë të përpunuar biologjik si dhe teknikat që përdoren në prodhimin e tij dhe mbajtja e detyrueshme e të dhënave, miratohen me udhëzim të ministrit.

Neni 18

Rregullat për prodhimin e majave biologjike

1. Operatori i cili prodhon maja për t'u përdorur si ushqim ose ushqim për kafshë, përvec rregullave të prodhimit të përcaktuara në nenin 9, 11, 16 dhe 17 të këtij ligji, zbaton edhe rregullat e përcaktuara në këtë nen.
2. Për prodhimin e majave biologjike përdoren vetëm substrate të prodhuara me metoda biologjike.
3. Majaja biologjike nuk duhet të jetë e pranishme së bashku me majanë jo biologjike në ushqimin biologjik ose në ushqimin biologjik për kafshë.
4. Rregulla të hollësishme për prodhimin e majave biologjike që përdoren si ushqim ose ushqim për kafshë si dhe të dhënat që duhet të mbajnë operatorët, miratohen me udhëzim të ministrit.

Neni 19

Rregullat e prodhimit për produktet e tjera

1. Në mungesë të rregullave të detajuara të prodhimit të produkteve të përcaktuara në shkronjën d) të pikës 1, të nenit 2, të këtij ligji, çdo operator përmbush parimet e përcaktuara në kreun II dhe rregullat e përgjithshme të prodhimit të përcaktuara në nenet 9, 10 dhe 11 të këtij ligji.
2. Rregullat e hollësishme për prodhimin dhe kalimin, për produktet e tjera përcaktohen me udhëzim të ministrit.

Neni 20

Rregullat përjashtuese në prodhimin biologjik

1. Kur si pasojë e fatkeqwsive natyrore ose fatkeqwsive të tjera kanë ndodhur ngjarje katastrofike, që e bëjnë të pamundur përmbushjen e rregullave të prodhimit, mund të lejohen përjashtime nga rregullat e prodhimit për një periudhë kohe të kufizuar, derisa prodhimi biologjik të mund të rikthehet në kushte normale, duke zbatuar parimet e përcaktuara në Kreun II të këtij ligji si dhe parashikimet e këtij neni.

2. Ministri urdhëron shpalljen e gjendjes “ngjarjes katastrofike” si pasojë e "motit të keq", "sëmundjes së kafshëve ose bimëve", "incidentit mjedisor", "fatkeqësisë natyrore" ose çdo situatë tjetër të krahasueshme, bazuar në kriteret e përcaktuara në pikën 5 të këtij neni.
3. Pas shpalljes zyrtare sipas pikës 2 të këtij neni, Komisioni i Prodhimit Biologjik, kryesisht, me identifikimin e operatorëve të prekur në zonën e shpallur ose me kërkesë nga një operator ose grup operatorësh në zonën e shpallur, vendos miratimin e përjashtimeve nga rregullat e prodhimit biologjik dhe kriteret që lidhen me to, me kusht që këto përjashtime dhe kriteret të zbatohen:
 - a. për një periudhë të kufizuar por jo më shumë se sa është e nevojshme, dhe në asnjë rast më shumë se 12 muaj, për të vazhduar ose rifilluar prodhimin biologjik siç është kryer përpara datës së zbatimit të këtyre përjashtimeve;
 - b. në lidhje me llojet specifike të prodhimit të prekura ose, sipas rastit, parcelat e tokës; dhe
 - c. për të gjithë operatorët biologjik përkatës të prekur në zonën e shpallur ose vetëm për operatorin ose grupin e operatorëve, sipas rastit.
4. Zbatimi i përjashtimeve nuk cenon vlefshmërinë e certifikatave zyrtare, gjatë periudhës kur zbatohen përjashtimet, me kusht që operatori ose grupi i operatorëve në fjalë të plotësojnë kriteret në të cilat janë dhënë përjashtimet.
5. Kriteret e përcaktimit të një situatë si “ngjarje katastrofike” ose çdo situatë e krahasueshme, rregullat dhe procedurat e KPB për miratimin e përjashtimeve nga rregullat e prodhimit, si dhe rregullat për monitorimin dhe raportimin në raste të tilla, miratohen me udhëzim të ministrit.

Neni 21

Grumbullimi, ambalazhimi, transporti dhe ruajtja

1. Operatori siguron që produktet biologjike dhe në kalim grumbullohen, ambalazhohen, transportohen dhe ruhen në përputhje me rregullat e përcaktuara në këtë nen.
2. Operatori mund të kryejë njëkohësisht grumbullimin e produkteve biologjike, në kalim dhe jo biologjike vetëm kur merren masa për të parandaluar çdo përzierje ose shkëmbim të mundshëm midis tyre dhe për të siguruar identifikimin e produkteve biologjike dhe në kalim. Operatori regjistron të dhënat mbi ditët, orët e mbledhjes, lëvizjet dhe datën dhe orën e magazinimit të produkteve për t’ua vënë në dispozicion autoritetit të kontrollit organik ose trupës së kontrollit.
3. Rregulla të hollësishme për grumbullimin, ambalazhimin, transportin dhe ruajtjen e produkteve biologjike, përcaktohen me udhëzim të ministrit.

Neni 22

Produktet dhe substancat që përdoren në prodhimin biologjik

1. Produktet dhe substancat që përdoren në prodhimin biologjik, përdoren për qëllimet si më poshtë:
 - a) si lëndë vepruese në përmbajtje të produkteve për mbrojtjen e bimëve;
 - b) si plehërues, përmirësues të tokës dhe lëndë ushqyese, në përmbajtje të produkteve plehërues;
 - c) si lëndë e parë për ushqime jo biologjike për kafshë me origjinë bimore, shtazore, nga algat, ose majatë ose si lëndë e parë për ushqime për kafshë me origjinë mikrobike apo minerale;
 - d) si produkte për pastrimin dhe dezinfektimin e pellgjeve, kafazeve, depozitave, kanaleve ujore, ndërtesave ose impianteve që përdoren për prodhimin biologjik shtazor;
 - e) si produkte për pastrimin dhe dezinfektimin e ndërtesave dhe impianteve që përdoren për prodhimin bimor, përfshirë ruajtjen në një fermë bujqësore;
 - f) si produkte për pastrim dhe dezinfektim në stabilimentet e përpunimit dhe ruajtjes.
2. Produktet dhe substancat që përdoren në prodhimin biologjik, i nënshtrohen parimeve të përcaktuara në Kreun II të këtij ligji dhe në mënyrë kumulative kritereve në vijim:
 - a) përdorimi i tyre është thelbësor për një prodhim të qëndrueshëm dhe për çfarë synohet të përdoret;
 - b) këto produkte dhe substanca janë me origjinë bimore, algash, shtazore, mikrobike ose minerale, përveçse kur ato, nuk gjenden në sasi të mjaftueshme ose cilësinë e duhur, si dhe nuk gjenden alternativa të tjera, nga burime të tilla.
 - c) në rastin e produkteve të përcaktuara në shkronjën a) të pikës 1 të këtij neni, zbatohen këto rregulla:
 - i. përdorimi i tyre është i domosdoshëm për kontrollin e dëmtuesve për të cilin nuk ka alternativa të tjera biologjike, fizike ose nga përmirësimi gjenetik i bimëve, praktika kultivimi ose praktika të tjera menaxhimi të efekshme;
 - ii. nëse produktet e tilla nuk janë me origjinë bimore, algash, shtazore, mikrobike ose minerale dhe nuk janë identike me formën e tyre natyrore, kushtet për përdorimin e tyre përjashtojnë çdo kontakt të drejtpërdrejtë me pjesët e ngrënshme të bimës.
 - d) në rastin e produkteve të përcaktuara në shkronjën b) të pikës 1, të këtij neni, përdorimi i tyre është i domosdoshëm për të rritur, ruajtur pjellorinë e tokës, përmbushur kërkesat e veçanta të të ushqyerit të bimëve ose për qëllime të veçanta, për përmirësimin e tokës;

- e) në rastin e produkteve të përcaktuara në shkronjën c) të pikës 1, zbatohen këto rregulla:
- i. përdorimi i tyre është i nevojshëm për ruajtjen e shëndetit, mirëqenies dhe vitalitetit të kafshëve dhe kontribuon për një ditë të përshtatshme që plotëson nevojat fiziologjike dhe të sjelljes së specieve në fjalë ose në rast se këto ushqime për kafshë nuk mund të prodhohen apo ruhen pa përdorimin e këtyre substancave;
 - ii. ushqimi për kafshë me origjinë minerale, oligoelementët, vitaminat ose provitaminat të jenë me origjinë natyrore, përveç rasteve kur produktet ose substancat nga këto burime nuk gjenden në sasi të mjaftueshme ose me cilësinë e duhur, ose nuk ka alternativa të tjera;
 - iii. përdorimi i lëndëve të para për ushqim jo-biologjik për kafshë me origjinë bimore ose shtazore është i nevojshëm sepse lëndët e para për ushqim për kafshë me origjinë bimore ose shtazore të prodhuara në përputhje me rregullat e prodhimit biologjik, nuk gjenden në sasi të mjaftueshme;
 - iv. përdorimi i erëzave, bimëve aromatike dhe melasës jo biologjike është i nevojshëm sepse produkte të tilla nuk gjenden në formë biologjike; ato duhet të prodhohen ose përgatiten pa tretës kimikë dhe përdorimi i tyre kufizohet në 1 % të racionit ushqimor për një specie të caktuar, llogaritur çdo vit si përqindje e lëndës së thatë të ushqimit për kafshë me origjinë bujqësore.
3. Produktet dhe substancat e sintetizuara kimikisht, në përputhje me pikën 1 të këtij neni, dhe pikën 1 të nenit 23, përdoren në mënyrë të kufizuar në rastet kur përdorimi i inputeve të jashtme të përmendura në shkronjën "g" të nenit 5 të këtij ligji, shkakton ndikime të papranueshme në mjedis.
 4. Lista e produkteve dhe substancave që përdoren në prodhimin biologjik, sipas pikës 1 të këtij neni, miratohet me urdhër të ministrit.
 5. Në prodhimin biologjik, përdoren vetëm PMB-të dhe produktet plehëruese, të cilat kanë në përmbajtje të tyre produktet dhe substancat e miratuara sipas pikës 4, të këtij neni.
 6. PMB-të dhe produktet plehëruese, që përdoren në prodhimin biologjik, miratohen nga komisionet e regjistrimit të PMB-ve dhe produkteve plehëruese, në Ministri.
 7. Lista e PMB-ve dhe produkteve plehëruese, publikohet në faqen zyrtare të Ministrisë, nga strukturat përgjegjëse për mbrojtjen e bimëve dhe për produktet plehëruese, në Ministri.
 8. Pas miratimit nga komisionet përkatëse të regjistrimit, PMB-të dhe produktet plehëruese pajisen me certifikatë miratimi për tu përdorur në bujqësinë biologjike si dhe në etiketën e produktit shtohet shënimi, "për përdorim në prodhimin biologjik".
 9. Procedura dhe dokumentacioni përkatës për miratimin e PMB-ve dhe produkteve plehëruese, si dhe format e certifikatës së miratimit dhe listës së tyre, propozohet nga struktura përgjegjëse për mbrojtjen e bimëve dhe për produktet plehëruese dhe miratohet me urdhër të ministrit.

Neni 23

Produktet dhe substancat që përdoren në prodhimin e ushqimeve dhe ushqimeve për kafshë, të përpunuara dhe majave

1. Produktet dhe substancat që përdoren në prodhimin e produkteve ushqimore biologjike, të përpunuara dhe majave që përdoren si ushqim ose ushqim për kafshë, përdoren për qëllimet si më poshtë:

- a) si aditivë ushqimore, aditivë të ushqimit për kafshë dhe lëndë ndihmëse për përpunimin;
- b) si përbërës bujqësorë jo biologjikë për prodhimin e ushqimeve biologjike të përpunuara;
- c) si lëndë ndihmëse përpunimi për prodhimin e majave dhe produkteve të tyre.

2. Produktet dhe substancat që përdoren në prodhimin e ushqimit biologjik dhe ushqimit për kafshë, të përpunuar ose për prodhimin e majave që përdoren si ushqim ose ushqim për kafshë, i nënshtrohen parimeve të përcaktuara në Kreun II të këtij ligji dhe në mënyrë kumulative kriterëve në vijim:

- a) nëse nuk gjenden, produkte apo substanca alternative të përcaktuara në përputhje me këtë nen ose teknologji në përputhje me këtë ligj;
- b) nëse pa përdorimin e tyre është e pamundur të prodhohen ose të ruhen ushqime ose ushqime për kafshë ose të plotësohen kërkesat e caktuara dietike të vendosura në bazë të legjislacionit në fuqi;
- c) këto produkte dhe substanca gjenden në natyrë dhe i nënshtrohen vetëm proceseve mekanike, fizike, biologjike, enzimatike ose mikrobike, me përjashtim të rasteve kur produktet ose substancat nga këto burime nuk gjenden në sasi të mjaftueshme ose me cilësinë e duhur;
- d) kur përbërësi biologjik nuk gjendet në sasi të mjaftueshme.

3. Lista e produkteve dhe substancave që përdoren në prodhimin e produkteve ushqimore dhe ushqimeve për kafshë, biologjike, të përpunuara dhe të majave që përdoren si ushqim ose ushqim për kafshë, sipas pikës 1 të këtij neni, miratohet me urdhër të ministrit.

Neni 24

Përdorimi i përbërësve bujqësorë jo biologjikë për ushqimet biologjike të përpunuara

1. Për të siguruar përbërës të caktuar bujqësorë që nuk gjenden në formë biologjike në sasi të mjaftueshme, dhe që janë miratuar për përdorim të përkohshëm nga të paktën një vend anëtar i Bashkimit Evropian, KPB me kërkesë të operatorit, miraton përkohësisht përdorimin e përbërësve bujqësorë jo biologjikë për prodhimin e ushqimeve biologjike të

përpunuara për një periudhë deri në gjashtë muaj. Ky miratim zbatohet për gjithë operatorët në Shqipëri.

2. Operatori vërtetohet se përbërësit nuk gjenden në formë biologjike në sasi të mjaftueshme duke paraqitur të paktën dy përgjigje negative nga furnizuesi, ku deklarohet se përbërësi nuk gjendet në formë biologjike, ose se sasia ekzistuese nuk është e mjaftueshme për nevojat e operatorëve.
3. KPB, me kërkesë të operatorit, zgjat miratimin deri në dy herë për maksimumi gjashtë muaj secila, me kusht që këta përbërës vazhdojnë të mos gjenden në formë biologjike në sasi të mjaftueshme.
4. Nëse edhe pas zgjatjes së dytë, përbërës të tillë nuk gjenden në formë biologjike dhe në sasi të mjaftueshme për të plotësuar nevojat e operatorëve, këta përbërës përdoren vetëm nëse miratohen sipas pikës 3 të nenit 23, të këtij ligji.
5. Rregulla të hollësishme për kërkesën për miratimin e përbërësve bujqësorë jo biologjikë për ushqimet biologjike të përpunuara si dhe dokumentacioni shoqërues miratohen me urdhër të ministrit.

Neni 25

Të dhënat mbi gjendjen në treg të materialit mbjellës dhe shumëzues bimor biologjik dhe në kalim, kafshëve biologjike dhe rasatit biologjik të peshqve në akuakulturë

1. Institucioni përgjegjës për farat dhe fidanet, krijon një bazë të dhënash e cila përditësohet rregullisht, për listimin e materialit mbjellës dhe shumëzues bimor biologjik dhe në kalim, me përjashtim të fidanëve por përfshirë pataten për farë, që gjenden në tregun shqiptar.
2. Në ministri ngrihet një sistem, që i lejon operatorët të cilët tregtojnë material mbjellës dhe shumëzues bimor biologjik ose në kalim, kafshë biologjike ose rasat peshku biologjike në akuakulturë, dhe që janë në gjendje t'i furnizojnë ato në sasi të mjaftueshme dhe brenda një kohe të arsyeshme, të bëjnë publike në bazë vullnetare, pa pagesë, bashkë me emrat e tyre dhe detajet e kontakteve, informacionet në vijim mbi:
 - a) materialin mbjellës dhe shumëzues bimor biologjik dhe në kalim, si p.sh. materialin mbjellës dhe shumëzues bimor biologjik heterogjen ose varietetet biologjike të përshtatshme për prodhim biologjik, duke përjashtuar fidanët, përfshirë patatet për farë, të cilat janë të disponueshme, sasinë dhe peshën e atij materiali, periudhën e disponueshmërisë së tij gjatë vitit. Këto materiale vendosen në listë të paktën me emrin shkencor latinisht.
 - b) kafshët biologjike për të cilat lejohen përjashtime në përputhje me nenin 14(3) të këtij ligji, numrin e kafshëve të disponueshme të ndara sipas gjinisë, informacionin mbi speciet e ndryshme të kafshëve për racat dhe llojet që disponohen, racat dhe moshën e kafshëve, dhe çdo informacion tjetër të rëndësishëm për to.

- c) rasati biologjik i peshkut në akuakulturë të disponueshme në fermë dhe statusin e tyre shëndetësor në përputhje me legjislacionin në fuqi për shëndetin e kafshëve dhe kapacitetin prodhues për çdo specie akuakulture.
3. QTTB Fushë Krujë krijon një bazë të dhënash të cilat lejojnë operatorët që tregtojnë raca dhe linja gjenetike të përshtatshme për prodhimin biologjik, blegtoral në përputhje me pikën 3 të nenit 14 të këtij ligji ose zogj pule biologjike dhe që janë në gjendje t'i furnizojnë ato kafshë në sasi të mjaftueshme dhe brenda një periudhe të arsyeshme, të bëjnë publike informacionin përkatës mbi baza vullnetare, pa pagesë, bashkë me emrat dhe detajet e kontaktit.
4. Operatorët që vendosin të përfshijnë informacione mbi materialin mbjellës dhe shumëzues bimor, kafshët ose rasatin e peshkut në akuakulturë, në sistemet e përcaktuara në paragrafët 2 dhe 3, sigurojnë përditësimin e rregullt të informacionit dhe heqjen nga lista kur materiali riprodhues bimor, kafshët ose rasati i peshkut në akuakulturë nuk janë të disponueshëm.
5. Detajet teknike për krijimin dhe mbajtjen e sistemeve/bazave të të dhënave mënyra e ndërlikohet, niveli i aksesit dhe bashkëveprimet me bazat e tjera të të dhënave përcaktohen me vendim të Këshillit të Ministrave.

Neni 26

Dyshimet për mospërputhje

Një operator, kur dyshon se një produkt i prodhuar, përgatitur ose importuar prej tij ose i pranuar nga një operator tjetër nuk është në përputhje me këtë ligj, ai, në përputhje me pikën 2 të nenit 27:

- a) identifikon dhe veçon produktin në fjalë;
- b) verifikon nëse dyshimi mund të vërtetohet;
- c) nuk e vendos në treg produktin në fjalë si produkt biologjik ose në kalim dhe nuk e përdor në prodhimin biologjik, përveç rastit kur dyshimi eliminohet;
- d) kur dyshimi për mospërputhje është vërtetuar ose kur nuk eliminohet, njofton menjëherë trupën e kontrollit dhe, nëse kërkohet, i jep të dhënat që disponon.
- e) bashkëpunon plotësisht me trupën e kontrollit përkatëse për të verifikuar dhe identifikuar arsyet e mospërputhjes së dyshuar.

Neni 27

Masat paraprake për shmangien e produkteve dhe substancave të palejuara

1. Operatori, për të shmangur ndotjen me produkte ose substanca të cilat nuk lejohen të përdoren në prodhimin biologjik, merr masa paraprake në çdo fazë të prodhimit, përgatitjes dhe shpërndarjes duke:
 - a) vendosur dhe zbatuar masa për të identifikuar rreziqet për ndotjen e prodhimit dhe produkteve biologjike me produkte ose substanca të palejuara, përfshirë identifikimin sistematik të hapave kritike procedurale;

- b) vendosur dhe zbatuar masa për të shmangur rrezikun e ndotjes së prodhimit dhe produkteve biologjike me produkte ose substanca të palejuara;
 - c) rishikuar dhe përshtatur rregullisht këto masa; dhe
 - d) plotësuar kërkesat e tjera përkatëse të këtij ligji, të cilat garantojnë veçimin e produkteve biologjike, në kalim dhe jo biologjike.
2. Kur operatori dyshon, për praninë e produkteve ose substancave të palejuara në një produkt ushqimor që përdoret ose tregtohet si biologjik ose në kalim:
- a) identifikon dhe veçon produktin në fjalë;
 - b) kontrollon nëse dyshimi vërtetohet;
 - c) nuk e vendos në treg produktin në fjalë si produkt biologjik ose në kalim dhe nuk e përdor atë në prodhimin biologjik, përveç kur dyshimi eliminohet;
 - d) kur dyshimi është vërtetuar ose kur ai nuk eliminohet, njofton menjëherë trupën e kontrollit përkatëse, dhe i jep të dhënat që disponon, kur kërkohen;
 - e) bashkëpunon me trupën përkatëse të kontrollit, për të identifikuar dhe verifikuar arsyet e pranisë së produkteve ose substancave të palejuara.

Neni 28

Masat e marra në rast të pranisë së produkteve ose substancave të palejuara

1. Kur Ministria, autoriteti i kontrollit organik ose trupa e kontrollit, sipas rastit, merr informacion të vërtetuar për praninë e produkteve ose substancave të palejuara në prodhimin biologjik, ose është njoftuar nga një operator në përputhje me pikën 2 (d) të nenit 27, ose zbulon produkte ose substanca të tilla në një produkt biologjik ose në kalim:
 - a) kryen menjëherë një hetim zyrtar për të përcaktuar burimin dhe shkakun e pranisë së tyre, brenda një periudhe të caktuar duke marrë parasysh jetëgjatësinë e produktit dhe kompleksitetin e rastit;
 - b) në pritje të rezultateve të hetimit zyrtar ndalon përkohësisht vendosjen në treg të këtyre produkteve biologjike ose në kalim dhe përdorimin e tyre në prodhimin biologjik;
2. Produkti në fjalë nuk tregtohet si produkt biologjik ose në kalim dhe nuk përdoret në prodhimin biologjik, nëse autoriteti kompetent që kryen hetimin zyrtar ka përcaktuar se operatori:
 - a) ka përdorur produkte ose substanca të palejuara për t'u përdorur në prodhimin biologjik;
 - b) nuk ka marrë masat paraprake të përcaktuara në pikën 1 të nenit 27;
 - c) nuk ka marrë masa në zbatim të kërkesave të mëparshme përkatëse nga ministria, autoriteti i kontrollit organik ose trupa e kontrollit, sipas rastit.
3. Operatorit në fjalë i jepet mundësia për të komentuar rezultatet e hetimit zyrtar të kryer.
4. Ministria, autoriteti i kontrollit organik ose trupa e kontrollit, sipas rastit, mban të dhëna dhe shënime të dokumentuara për hetimin zyrtar të kryer.
5. Operatori në fjalë merr masat korrigjuese të nevojshme për të shmangur ndotjet në të ardhmen.

6. Ministria, autoriteti i kontrollit organik ose trupa e kontrollit, sipas rastit, dokumenton rezultatet e hetimit zyrtar dhe çdo mase të marrë.
7. Metodologjia e hetimit zyrtar dhe hapat proceduralë që ndiqen nga operatori në rast dyshimi për praninë e produkteve ose substancave të palejuara, dhe masat e duhura për identifikimin dhe shmangien e riskut të kontaminimit, përcaktohen me udhëzim të ministrit.

KREU IV

Etiketimi

Neni 29

Përdorimi i termave që i referohen prodhimit biologjik

1. Për qëllim të këtij ligji, një produkt konsiderohet që i mbart termat që i referohen metodës biologjike të prodhimit kur në etiketimin, reklamën ose dokumentet tregtare, produkti, përbërësit e tij ose lëndët e para të ushqimit për kafshë të përdorura për prodhimin e tij, përshkruhen me terma që informojnë konsumatorin ose blerësin se janë prodhuar në përputhje me rregullat e përcaktuara në këtë ligj.
2. Termi "biologjik" ose "organik" dhe shkurtime, si "bio" ose "eko", përdoren të vetme ose të kombinuara për etiketimin dhe reklamimin e produkteve të përcaktuara në pikën 1 të nenit 2 të këtij ligji.
3. Për produktet e përcaktuara në fushën e këtij ligji, termat që i referohen prodhimit biologjik, nuk përdoren për etiketimin, reklamën ose në dokumentet tregtare të një produkti i cili nuk është në përputhje me këtë ligj. Gjithashtu, në etiketim apo reklama, nuk përdoren terma përfshirë edhe termat që përdoren në markat tregtare ose emrat e kompanive, ose praktika të tjera, që mund të keqinformojnë ose mashtrojnë konsumatorin ose përdoruesin duke sugjeruar se një produkt ose përbërësit e tij plotësojnë kërkesat e përcaktuara në këtë ligj.
4. Produktet e prodhuara gjatë periudhës së kalimit nuk etiketohen ose reklamohen si produkte biologjike ose në kalim. Materiali mbjellës dhe shumëzues bimor, produktet ushqimore me origjinë bimore dhe ushqimet për kafshë me origjinë bimore të prodhuara gjatë periudhës së kalimit, mund të etiketohen dhe reklamohen si produkte në kalim duke përdorur termin 'në kalim', bashkë me termat e përcaktuara në pikën 2.
5. Termat e përcaktuar në pikën 1 dhe 4, nuk përdoren për një produkt për të cilin në etiketim ose reklamë tregohet se produkti përmban OMGJ, përbëhet nga OMGJ ose është prodhuar nga OMGJ.

Neni 30
Etiketimi i produkteve në kalim

1. Treguesit e përcaktuar në pikën 4, të nenit 29, për produktet në kalim, me origjinë bimore, paraqiten:
 - a) me ngjyrë, madhësi dhe shkrim të tillë, që të mos jetë më i dukshëm se përshkrimi i shitjes së produktit dhe të gjithë treguesit të ketë të njëjtën madhësi shkrimi;
 - b) në të njëjtën fushë pamje me numrin e kodit të trupës së kontrollit siç përcaktohet në shkronjën a) të pikës 1 të nenit 33 të këtij ligji.
2. Treguesi i numrit të kodit të trupës së kontrollit, paraqitet në të njëjtën fushë pamje me logon kombëtare të prodhimit biologjik, kur përdoret në etiketim.
3. Treguesi i vendit ku janë kultivuar lëndët e para bujqësore nga të cilat përbëhet produkti, siç përcaktohet në pikën 2, të nenit 33 të këtij ligji, vendoset poshtë numrit të kodit të trupës së kontrollit.

Neni 31
Etiketimi i ushqimeve biologjike të përpunuara

1. Për ushqimin e përpunuar termat që i referohen metodës biologjike të prodhimit, të përcaktuar në pikën 1, të nenit 29, përdoren:
 - a) në përshkrimin e shitjes dhe në listën e përbërësve, kur një listë e tillë është e detyrueshme në përputhje me legjislacionin në fuqi për etiketimin, me kusht që:
 - i. ushqimet e përpunuara të jenë në përputhje me rregullat e përcaktuara në këtë ligj, në vecanti kërkesat e pikës 7, të nenit 16, të këtij ligji.
 - ii. të paktën 95% e peshës së përbërësve bujqësorë të produktit të jenë biologjikë; dhe
 - iii. sa i përket aromatizuesve, ato përdoren vetëm për substanca dhe preparate natyrale aromatizuese, të etiketuara në përputhje me legjislacionin në fuqi për aromatizuesit dhe të gjithë përbërësit aromatizues dhe bartësit e përbërësve aromatizues në aromatizuesin në fjalë, të jenë biologjikë.
 - b) vetëm në listën e përbërësve, me kusht që:
 - i. më pak se 95% e peshës së përbërësve bujqësorë të produktit të jenë biologjikë dhe me kusht që këta përbërës të jenë në përputhje me rregullat e prodhimit të përcaktuara në këtë ligj; dhe
 - ii. ushqimet e përpunuara të jenë në përputhje me rregullat e prodhimit të përcaktuara në këtë ligj, në vecanti me kërkesat e pikës 7, të nenit 16, me përjashtim të rregullave për përdorimin e kufizuar të përbërësve bujqësore jo biologjikë;
 - c) në përshkrimin për shitje dhe në listën e përbërësve, me kusht që:
 - i. përbërësi kryesor të jetë një produkt gjuetie ose peshkimi;

- ii. termat që i referohen prodhimit biologjik, e përcaktuar në pikën 1 të nenit 29, lidhen qartë me një përbërës tjetër biologjik dhe të ndryshëm nga përbërësi kryesor;
 - iii. të gjithë përbërësit e tjerë bujqësorë të jenë biologjikë; dhe
 - iv. ushqimet e përpunuara të jenë në përputhje me rregullat e prodhimit të përcaktuara në këtë ligj dhe aktet nënligjore, në vecanti pikën 7 të nenin 16, me përjashtim të rregullave për përdorimin e kufizuar të përbërësve bujqësorë jo biologjikë;
2. Lista e përbërësve të përcaktuar në shkronjat (a), (b) dhe (c) të pikës 1, tregon se cilët përbërës janë biologjikë. Referimet për prodhimin biologjik, vendosen vetëm për përbërësit biologjikë.
 3. Lista e përbërësve të përcaktuar në shkronjat (b) dhe (c) të pikës 1, përfshin një tregues të përqindjes totale të përbërësve biologjikë në raport me sasinë totale të përbërësve bujqësorë.
 4. Termat që i referohen metodës biologjike të prodhimit, kur përdoren në listën e përbërësve të përcaktuar në shkronjat (a), (b) dhe (c) të pikës 1, dhe treguesi i përqindjes së përcaktuar në pikën 3, vendosen me ngjyrë, madhësi dhe shkrim të njëjtë me treguesit e tjerë në listën e përbërësve.
 5. Për ushqimet e përpunuara për kafshë termat që i referohen metodës së prodhimit biologjik, përdoren në përshkrimin e shitjes dhe në listën e përbërësve, me kusht që:
 - a) ushqimi i përpunuar për kafshë të jetë në përputhje me rregullat e prodhimit të përcaktuara në pikën 3, të nenit 17 të këtij ligji;
 - b) të gjithë përbërësit me origjinë bujqësore që përmbahen në ushqimin e përpunuar të jenë biologjikë; dhe
 - c) të paktën 95% e lëndës së thatë të produktit të jetë biologjikë.
 6. Rregulla të tjera për etiketimin e produkteve biologjike dhe në vecanti për produktet e përcaktuara në shkronjën d, të pikës 1, të nenit 2, miratohen me udhëzim të ministrit.

Neni 32

Etiketimi i produkteve dhe i substancave që përdoren në prodhimin bimor

Pavarësisht nga fusha e këtij ligji, produktet dhe substancat e përdorura në produktet për mbrojtjen e bimëve ose produktet plehëruese, përmirësues të tokës ose lëndë ushqyese, të miratuara për tu përdorur në prodhimin biologjik, në përputhje me nenin 9, 22 dhe 23, të këtij ligji, mund të mbartin një referencë që tregon se janë të lejuara të përdoren për prodhimin biologjik në përputhje me këtë ligj.

Neni 33

Treguesit e detyrueshëm

1. Kur produktet mbartin termat që i referohen metodës biologjike të prodhimit, përfshirë produktet e etiketuara si produkte në kalim, duhet që:
 - a) në etiketim vendoset emri dhe numri i kodit të trupës së kontrollit, subjekt i së cilës ka qënë operatori, që ka kryer veprimin, procesin e fundit të prodhimit ose përgatitjes, dhe
 - b) në ambalazhin e ushqimit të para ambalazhuar, vendoset dukshëm logoja kombëtare e prodhimit biologjik, përveç rasteve të përcaktuara në pikën 4, të nenit 29 dhe shkronjat b) dhe c) të pikës 1 të nenit 31.

2. Kur vendoset logoja kombëtare, në të njëjtën fushë pamje me të, vendoset një tregues i vendit ku janë kultivuar lëndët e para bujqësore nga të cilat përbëhet produkti, dhe, sipas rastit, në një nga format e mëposhtme:
 - a) “Bujqësi Shqiptare”, kur lënda e parë bujqësore është kultivuar në Shqipëri;
 - b) “Bujqësi jo Shqiptare”, kur lënda e parë bujqësore është kultivuar në vende të tjera;
 - c) “Bujqësi Shqiptare/jo Shqiptare”, kur një pjesë e lëndëve të para bujqësore është kultivuar në Shqipëri dhe pjesa tjetër në një vend tjetër.
 - d) Treguesi "Bujqësi" mund të zëvendësohet me "Akuakulturë" dhe treguesi “Shqiptare” dhe “Jo-Shqiptare”, mund të zëvendësohet ose plotësohet me emrin e rajonit ose vendit në rastin kur të gjitha lëndët e para bujqësore nga të cilat përbëhet produkti janë kultivuar në atë rajon apo vend.
 - e) Për të treguar vendin ku janë kultivuar lëndët e para bujqësore nga të cilat përbëhet produkti, nuk merren parasysh sasi të vogla në peshë të përbërësve kur sasia e përgjithshme e këtyre përbërësve nuk kalon 5 % të sasisë së përgjithshme në peshë të lëndëve të para me origjinë bujqësore.
 - f) Treguesi "Shqiptar" ose "jo-Shqiptar" nuk duhet të paraqitet me shkronja me ngjyrë, madhësi dhe stil që e bëjnë më të dukshëm se përshkrim për shitje i produktit.
3. Treguesit e detyrueshëm dhe logoja kombëtare kur përdoret për produktet e importuara, vendosen në një vend të dukshëm, lehtësisht dhe qartësisht e lexueshme dhe të mos fshihet.

Neni 34

Logo kombëtare e prodhimit biologjik

1. Logoja kombëtare e prodhimit biologjik përdoret në etiketimin, paraqitjen dhe reklamimin e produkteve të prodhuara në vend të cilat plotësojnë kërkesat e përcaktuara në këtë ligj dhe që vendosen në tregun shqiptar.
2. Logoja kombëtare e prodhimit biologjik mund të përdoret edhe për qëllime informimi dhe edukimi lidhur me ekzistencën dhe reklamimin e vetë logos, me kusht që një përdorim i tillë të mos keqinformojë konsumatorin lidhur me prodhimin biologjik të produkteve të

- veçanta, dhe me kusht që logoja të riprodhohet në përputhje me rregullat e përcaktuara në pikën 7 të këtij neni. Në këto raste nuk zbatohen kërkesat e pikës 2 të nenit 33, të këtij ligji .
3. Logoja kombëtare e prodhimit biologjik nuk përdoret për produktet biologjike të përpunuara të përcaktuara në shkronjat b) dhe c) të pikës 1, të nenit 31 dhe produktet në kalim.
 4. Përdorimi i logos shqiptare të prodhimit biologjik është vullnetare për produktet e importuara nga shtetet anëtare të BE-sw si dhe nga vendet e treta. Kur kjo logo vendoset në etiketimin e produkteve të tilla, treguesi i vendit ku janë kultivuar lëndët e para bujqësore nga të cilat përbëhet produkti, vendoset në etiketim.
 5. Në etiketimin, paraqitjen dhe reklamën e produkteve biologjike mund të përdoren edhe logo të tjera private.
 6. Logo europiane për prodhimin biologjik mund të përdoret në etiketimin, paraqitjen dhe reklamimin e produkteve të importuara të cilat plotësojnë kërkesat e përcaktuara në kreun VIII të këtij ligji.
 7. Rregullat e hollësishme për përbërjen, paraqitjen, madhësinë dhe dizenjimin e logos kombëtare, përcaktohen me vendim të Këshillit të Ministrave.

KREU V CERTIFIKIMI

Neni 35 Regjistrimi i aktivitetit

1. Përpara vendosjes në treg të cdo produkti si biologjik, në kalim ose para periudhës së kalimit, operatori dhe grupi i operatorëve, të cilët prodhojnë, përgatisin, shpërndajnë ose ruajnë produkte biologjike ose në kalim, që importojnë ose eksportojnë, ose vendosin në treg produkte të tilla, regjistron aktivitetin e tij në Ministri.
2. Operatori ose grupi i operatorëve përcaktojnë në kërkesën për regjistrim, trupën e kontrollit që do të verifikojë nëse aktiviteti i tyre është në përputhje me këtë ligj dhe i pajis me certifikatë zyrtare.
3. Pasi operatori ose grupi i operatorëve ka paraqitur kërkesën për regjistrim, lidh kontratë me trupën e kontrollit të zgjedhur. Brenda 90 ditëve nga lidhja e kontratës, trupa e kontrollit përfundon inspektimin e operatorit, lëshon certifikatën zyrtare dhe e dërgon atë në Ministri.
4. Operatorët që shesin produkte biologjike të para ambalazuara direkt te konsumatori ose përdoruesi i fundit, përjashtohen nga detyrimi për regjistrim dhe nga detyrimi për tu pajisur me certifikatë zyrtare, me kusht që të mos:
 - a) prodhojnë, përgatisin, ruajnë përveç rasteve të ruajtjes së këtyre produkteve të ambalazuara në pikën e shitjes,
 - b) importojnë produkte të tilla; dhe
 - c) nënkontraktjnë aktivitete të tilla me një operator tjetër.

5. Operatorët, grupet e operatorëve dhe nënkontraktorët mbajnë të dhëna për aktivitetet që kryejnë në përputhje me këtë ligj.

Neni 36

Nënkontraktimi i aktivitetit tek palët e treta

1. Operatori ose grupi i operatorëve mund të nënkontraktojnë një nga aktivitetet e tyre palëve të treta.
2. Operatori ose grupi i operatorëve dhe nënkontraktuesit duhet të regjistrojnë aktivitetin, përveç rastit kur operatori ose grupi i operatorëve ka deklaruar në kërkesën për regjistrim, se mban përgjegjësi për prodhimin biologjik dhe nuk ia ka transferuar nënkontraktuesit.
3. Trupa e kontrollit verifikon nëse aktivitetet e nënkontraktuara janë në përputhje me këtë ligj, në kuadër të kontrollit që kryen tek operatori ose grupi i operatorëve të cilët kanë nënkontraktuar aktivitetet e tyre.

Neni 37

Menaxhimi i procesit të regjistrimit

1. Në Ministri, ngrihet sektori për prodhimin biologjik, i cili pranon kërkesat dhe menaxhon procesin e regjistrimit.
2. Ministria mban listën e përditësuar me emrat dhe adresat e operatorëve ose grup operatorëve, që kanë regjistruar aktivitetin e tyre, bashkë me informacionin për certifikatat zyrtare të lëshuara dhe e publikon në faqen zyrtare. Publikimi i këtyre të dhënave kryhet në përputhje me legjislacionin në fuqi për mbrojtjen e të dhënave personale.
3. Ministria siguron që çdo operator apo grup operatorësh të cilët përmbushin kërkesat e këtij ligji dhe që paguajnë një tarifë që mbulon koston e kontrolleve, të përfshihet në sistemin biologjik të kontrollit.
4. Ministria siguron që çdo trupë kontrolli publikon dhe përditëson në faqen e saj zyrtare tarifat për inspektimin dhe certifikimin e operatorëve dhe grup operatorëve në sistemin e tyre të kontrollit.
5. Rregulla të hollësishme për formatin dhe mjetet teknike të regjistrimit të aktivitetit, masat për publikimin e listës e operatorëve dhe grup operatorëve të regjistruar dhe procedurat dhe masat për publikimin e tarifave, miratohen me udhëzim të ministrit.

Neni 38

Pajisja me certifikatë zyrtare

1. Trupat e kontrollit pajisin me certifikatë zyrtare çdo operator ose grup operatorësh që ka paraqitur kërkesë për regjistrimin e aktivitetit të tij dhe është në përputhje me kërkesat e këtij ligji.

2. Certifikata zyrtare:
 - a) lëshohet në format fizik ose elektronik kur është e mundur,
 - b) lejon të paktën identifikimin e operatorit ose grupit të operatorëve duke përfshirë listën e anëtarëve, kategorinë e produkteve që mbulon certifikata dhe periudhën e vleshmërisë së saj;
 - c) vërteton që operatori që ka kërkuar për të regjistruar aktivitetin e tij është në përputhje me këtë ligj;
 - d) lëshohet në përputhje me modelin e përcaktuar në këtë nen.
3. Operatorët dhe grupet e operatorëve, pa cenuar pikën 4 të nenit 35, nuk i vendosin në treg produktet e fushës së zbatimit të këtij ligji, si produkte biologjike ose produkte në kalim, pa regjistruar aktivitetin dhe pajisur me certifikatë zyrtare.
4. Një operator ose grup operatorësh nuk ka të drejtë të pajiset me certifikatë nga më shumë se një trupë kontrolli për aktivitetet e kryera lidhur me të njëjtën kategori produktesh, përfshirë rastet kur operatori ose grupi i operatorëve kryejnë aktivitetet në faza të ndryshme të prodhimit, përgatitjes dhe shpërndarjes.
5. Anëtarët e një grupi operatorësh nuk mund të pajisen me certifikatë individuale për asnjë nga aktivitetet që mbulohen nga certifikimi i grupit të operatorëve të cilit i përkasin.
6. Operatorët verifikojnë certifikatat e operatorëve nga të cilët furnizohen.
7. Produktet biologjike që certifikohen klasifikohen në kategoritë si më poshtë:
 - a) bimë dhe produkte me origjinë bimore të papërpunuara, përfshirë farat dhe materiale të tjera mbjellëse dhe shumëzuese bimore;
 - b) kafshët dhe produktet shtazore të papërpunuara;
 - c) algat dhe produktet e papërpunuara nga akuakultura;
 - d) produktet bujqësore të përpunuara, përfshirë produktet nga akuakultura, të cilat përdoren si ushqim;
 - e) ushqimet për kafshë;
 - f) vera
 - g) produkte të tjera të përcaktuara në shkronjën d) të pikës 1, të nenit 2 të këtij ligji ose që nuk përfshihen në kategoritë e mësipërme.
7. Modeli i Certifikatës zyrtare dhe mënyrat teknike të lëshimit, miratohen me Udhëzim të Ministrit.

Neni 39

Grupi i operatorëve

1. Cdo grup operatorësh përbëhet vetëm nga anëtarë të cilët janë fermerë ose operatorë të cilët prodhojnë alga ose kafshë të akuakulturës dhe që mund të kryejnë edhe përpunimin, përgatitjen ose vendosjen në treg të ushqimeve ose ushqimeve për kafshë.
2. Grupi i operatorëve përbëhet vetëm nga anëtarë:
 - a) me kosto individuale të certifikimit mbi 2% të xhiros së ose vëllimit standard të prodhimit biologjik të secilit dhe xhiro vjetore e prodhimit biologjik nuk është mbi 25 000 Euro ose vëllimi standard i prodhimit biologjik të tyre, nuk është mbi 15 000 Euro në vit; ose

- b) të cilët kanë ferma maksimumi:
 - i. 5 hektarë, 1.5 -2 ha
 - ii. 0,5 hektarë, në rastin e serave, ose
 - iii. 15 (10 ha) hektarë, vetëm në rastin e kullotave të përhershme;
- 7. Grupi i operatorëve regjistrohet në regjistrin tregtar të shqipërisë, në regjistrin tregtar të një vendi të BE ose një vendi të tretë dhe zotëron personalitet juridik sipas ligjit;
- 8. Grupi i operatorëve përbëhet vetëm nga anëtarë të cilët:
 - a) kryejnë aktivitetet prodhuese në zona gjeografike pranë njëri-tjetrit në Shqipëri, BE ose në vendin e tretë,
 - b) krijojnë një sistem të përbashkët tregtimi për produktet e prodhuara nga grupi;
 - c) krijojnë një sistem kontrolli të brendshëm i cili përfshin procedura të dokumentuara të kontrollit të aktiviteteve, në bazë të të cilave një person ose një organ i identifikuar janë përgjegjës për të verifikuar plotësimin e kërkesave të këtij ligji nga çdo anëtar i grupit.
- 5. Trupa e kontrollit, i heq, tërheq gjithë grupit certifikatën zyrtare, kur mangësitë në ngritjen apo funksionimin e sistemit të kontrollit të brendshëm, vecanërisht pamundësitë për të gjetur dhe adresuar mospërputhshmëritë tek anëtarët individualë të grupit të operatorëve, ndikojnë në integritetin e produkteve biologjike dhe në kalim.
- 6. Rregulla të tjera, lidhur me përbërjen dhe funksionimin e grupit të operatorëve, miratohen me udhëzim të ministrit.

KREU VI

KONTROLLET ZYRTARE DHE AKTIVITETET E TJERA ZYRTARE

Neni 40

Rregullat për kontrollet zyrtare

Rregullat e vecanta të përcaktuara në këtë kre zbatohen, përveç rregullave të përcaktuara në legjislacionin në fuqi për inspektimet dhe kontrollet zyrtare dhe aktivitetet e tjera zyrtare lidhur me kontrollin e ushqimit, ushqimit për kafshë, shëndetin dhe mirëqenien e kafshëve, shëndetin e bimëve dhe produktet për mbrojtjen e bimëve, përveç kur parashikohet ndryshe në këtë ligj, për të verifikuar, në të gjitha fazat e prodhimit, përgatitjes dhe shpërndarjes, se produktet biologjike janë prodhuar në përputhje me këtë ligj.

Neni 41

Kontrollet zyrtare dhe veprimet që meren nga autoritetet kompetente

- 1. Kontrollet zyrtare të kryera në përputhje me rregullat e përgjithshme të përcaktuara në legjislacionin në fuqi për kontrollet zyrtare, për verifikimin e përputhshmërisë me këtë ligj përfshijnë, në veçanti:
 - a) verifikimin nga trupa e kontrollit, për zbatimin e masave parandaluese dhe paraprake, të përcaktuara në këtë ligj, në çdo fazë të prodhimit, përgatitjes dhe shpërndarjes nga operatorët;

- b) kur ferma përfshin njësi prodhimi jo biologjike ose në kalim, verifikimin nga trupa e kontrollit, e të dhënave, masave, procedurave ose ndërhyrjeve të kryera për të siguruar ndarjen e dukshme dhe efektive të njësive të prodhimit biologjik, në kalim dhe jo biologjik dhe të produkteve përkatëse të prodhuara nga këto njësi si dhe verifikimin e substancave dhe produkteve të përdorura për njësitë e prodhimit biologjik, në kalim dhe jo biologjik. Një verifikim i tillë përfshin kontrollet në parcelat për të cilat është miratuar një periudhë e mëparshme në mënyrë prapavepruese si pjesë e periudhës së kalimit, dhe kontrollet në njësitë e prodhimit jo biologjik;
- c) kur produktet biologjike, në kalim dhe jo biologjike vilen apo mbledhen njëkohësisht, përgatiten ose ruhen në të njëjtën njësi përgatitjeje, zonë apo mjedis, ose transportohen tek operatorë ose njësi të tjera verifikimi nga trupa e kontrollit:
- i. i të dhënave të mbajtura dhe i masave, procedurave ose i zbatimit të masave për të siguruar se veprimet kryhen të ndara në hapësirë ose kohë,
 - ii. nëse janë zbatuar masat e duhura për pastrimin dhe masat për të parandaluar shkëmbimin e produkteve,
 - iii. nëse produktet biologjike dhe në kalim janë të identifikueshme dhe se produktet biologjike, në kalim dhe jo biologjike magazinohen të ndara nga njëra-tjetra në hapësirë ose kohë, para dhe pas proceseve të përgatitjes.
- d) verifikimin nga trupa e kontrollit, e ngritjes dhe funksionimi të sistemit të kontrollit të brendshëm të grupeve të operatorëve;
- e) kur operatorët janë të përjashtuar nga detyrimi i regjistrimit, verifikimin nga AKU nëse kërkesat për këtë përjashtim plotësohen dhe verifikimin nëse produktet e shitura nga këta operatorë plotësojnë kërkesat për përjashtim.

2. Në çdo rast, të gjithë operatorët dhe grupet e operatorëve, me përjashtim të atyre të përcaktuar në pikën 4 të nenit 35, i nënshtrohen kontrollit për verifikimim e përputhshmërisë me rregullat e këtij ligji, të paktën një herë në vit.

3. Verifikimi i përputhshmërisë përfshin një inspektim fizik në vend, me përjashtim të rasteve kur:

a) nga kontrollet e mëparshme të operatorit ose grupit të operatorëve nuk janë konstatuar mospërputhje që ndikojnë në integritetin e produkteve biologjike ose në kalim, për të paktën tre vjet radhazi; dhe

b) operatori ose grupi i operatorëve është vlerësuar që paraqet risk të ulët për mospërputhje në bazë të rregullave të përgjithshme për kontrollet zyrtare. Në këto raste, periudha ndërmjet dy inspektimeve fizike në vend nuk duhet të jetë më shumë se 24 muaj.

4. Kontrollet zyrtare, për verifikimin e përputhshmërisë me këtë ligj:

a) kryhen pa njoftim paraprak, përveç rasteve kur një njoftim i tillë është i nevojshëm dhe i justifikuar, në përputhje me ligjin për inspektimin. Për sa i përket kontrolleve zyrtare me kërkesë të operatorit, autoriteti kompetent sipas rastit, Ministria, AKU ose trupa e kontrollit, vendosë nëse kontrollet zyrtare do të kryhen me ose pa njoftim paraprak, duke siguruar që një përqindje minimale e gjitha kontrolleve zyrtare të operatorëve ose grupeve të operatorëve, të kryhen pa paralajmërim.

b) sigurojnë që të kryhen kontrolle shtesë në një përqindje minimale ndaj atyre të përcaktuara në shkronjën a) të kësaj pike.

c) kryhen me marrjen e një numri minimal të mostrave përfshirë analizat, diagnozën dhe testet;

d) sigurojnë që një numër minimal i operatorëve anëtarë të një grupi operatorësh kontrollohen për verifikimin e përputhshmërisë.

5. Lëshimi ose rinovimi i certifikatës zyrtare, bazohet në rezultatet e verifikimit të përputhshmërisë sipas këtij neni.

Neni 42

Përcaktimi i rrishtut për kryerjen e kontrollit zyrtar

Kontrollet zyrtare që kryhen nga AKU ose trupat e kontrollit në përputhje me kërkesat e përgjithshme për kontrollet zyrtare, kryhen gjatë gjithë procesit në të gjitha fazat e prodhimit, përgatitjes dhe shpërndarjes në bazë të rrishtut për mos përputhshmëri, e cila përcaktohet duke marrë parasysh elementët në vijim:

a) llojin, madhësinë dhe strukturën e operatorëve dhe grupeve të operatorëve;

b) periudhën e kohës gjatë së cilës operatorët dhe grupet e operatorëve janë përfshirë në prodhimin biologjik, përgatitjen dhe shpërndarjen e tyre;

c) rezultatet e mëparshme të kontrolleve të kryera;

d) kohën më të përshtatshëm për aktivitetet e kryera;

e) kategoritë e produkteve;

f) llojin, sasinë dhe vlerën e produkteve dhe zhvillimin e tyre në kohë;

g) mundësinë e shkëmbimit ose kontaminimit të produkteve biologjike me produkte apo substanca të palejuara të përdoren në prodhimin biologjik;

h) zbatimin e rregullave përjashtuese për operatorët dhe grupet e operatorëve;

i) pikat kritike për mospërputhje dhe mundësia për mospërputhje në çdo fazë të prodhimit, përgatitjes dhe shpërndarjes;

j) aktivitetet e nënkontraktuara.

Neni 43

Dokumentimi i kontrolleve zyrtare

1. Për çdo kontroll zyrtar të kryer për të verifikuar përmbushjen e kërkesave të këtij ligji, AKU ose trupa e kontrollit harton një procesverbal apo raport me shkrim.

2. Procesverbali ose raporti i kontrollit, mbahen me shkrim ose në formë elektronike dhe duhet të përmbajnë:

a) një përshkrim të qëllimit të kontrolleve zyrtare;

- b) metodat e aplikuara të kontrollit;
 - c) rezultatet e kontrolleve zyrtare; dhe
 - d) aty ku është e përshtatshme, masat që AKU ose trupat e kontrollit kërkon që operatori të ndërmarrë.
3. Procesverbali ose raporti i kontrollit, bashkëfirmoset nga operatori ose grupet e operatorëve si konfirmim për marrjen e këtij raporti.
4. Për auditimet dhe inspektimet e kryera nga Ministria në kuadër të aktiviteteve të mbikëqyrjes së trupave të kontrollit, të cilave u janë caktuar detyra për kontrollet zyrtare ose aktivitete të tjera zyrtare, nuk mbahet procesverbal ose raport kontrolli.
5. Rregulla të hollësishme për kontrollin e produkteve biologjike përcaktohen me udhëzim të ministrit.

Neni 44

Masat që merren nga operatorët dhe grupet e operatorëve

1. Operatorët dhe grupet e operatorëve, përvec detyrimeve të përcaktuara në legjislacionin në fuqi për kontrollet zyrtare:
- a) mbajnë regjistrime dhe të dhëna që tregojnë përputhshmërinë me kërkesat e këtij ligji;
 - b) bëjnë të gjitha deklaratat dhe komunikimet e tjera të nevojshme për kontrollet zyrtare;
 - c) marrin masat dhe veprimet e duhura për të siguruar përputhshmërinë me këtë ligj;
2. Operatorët dhe grupet e operatorëve paraqesin një deklaratë e cila nënshkruhet dhe përditësohet kur është e nevojshme, lidhur me:
- a) përshkrimin e plotë të njësisë së prodhimit biologjik ose në kalim dhe të aktiviteteve që kryhen në përputhje me këtë ligj;
 - b) masat dhe veprimet përkatëse që merren për të siguruar përputhshmërinë me këtë ligj;
 - c) marrjen për sipër:
 - i. të informojnë me shkrim dhe pa vonesa blerësit e produkteve dhe të shkëmbejë informacionet përkatëse me trupën e kontrollit ose kur është e nevojshme ministrinë, në rast se është vërtetuar një dyshim për mospërputhje, dyshimi për mospërputhje nuk eliminohet, ose kur vërtetohet mospërputhja që cënon integritetin biologjik të produkteve në fjalë.
 - ii. të pranojë transferimin e dosjes së kontrollit në rastin e ndryshimit të trupës së kontrollit ose, në rastin e largimit ose tërheqjes nga prodhimi biologjik të ruajë për të paktën pesë vjet dosjen e kontrollit të kryer nga trupa e kontrollit.
 - iii. të informojë menjëherë Ministrinë në rast të largimit ose tërheqjes nga sistemi i kontrollit të prodhimit biologjik.
 - iv. të pranojë shkëmbimin e informacioneve me trupat e tjera të kontrollit në rastin kur nënkontraktorët kontrollohen nga trupa të ndryshme kontrolli.

3. Rregulla të hollësishme lidhur me të dhënat që duhet të mbahen nga operatorët dhe grupi i operatorëve, deklaratat dhe komunikimet e tjera të nevojshme për kontrollet zyrtare, masat dhe veprimet përkatëse, miratohen me udhëzim të ministrit.

Neni 45

Trupat e kontrollit

1. Trupat e kontrollit, me qëllim verifikimin e plotësimit të rregullave të përcaktuara në këtë ligj, kryejnë detyrat si më poshtë:

a) inspektimin dhe certifikimin, e operatorëve dhe grup operatorëve në sistemin e tyre të kontrollit dhe aktiviteteve të tjera të lidhura me to;

b) miratimin e përjashtimit për përdorimin e materialit mbjellës dhe shumëzues bimor jo biologjik në prodhimin biologjik;

2. Trupat e kontrollit kryejnë detyrat e caktuara në këtë ligj vetëm nëse plotësojnë kushtet e përcaktuara në legjislacionin për kontrollin zyrtar dhe në veçanti:

a) janë të regjistruara në regjistrin tregtar në përputhje me ligjin për regjistrimin e aktivitetit tregtar;

b) zotërojnë ekspertizën, pajisjet dhe infrastrukturën e duhur për të kryer kontrollin zyrtar;

c) kanë numër të mjaftueshëm personeli me kualifikimin dhe përvojën e duhur;

d) janë të paanshme dhe nuk kanë asnjë konflikt interesi për të kryer këto detyra;

e) janë akredituar nga organi kombëtar i akreditimit, në përputhje me standardin ISO/IEC 17065, për fushën e këtij ligji;

f) kanë një katalog masash për t'u zbatuar në rastet e mospërputhshmërive të dyshuara ose të vërtetuara.

3. Trupat e kontrollit që veprojnë në Shqipëri sipas standardeve të tjera për prodhimin biologjik, regjistrojnë aktivitetin e tyre duke paraqitur kërkesën në Komisionin për Prodhimin Biologjik që përmban dokumentet në vijim:

a) kopje të certifikatës së regjistrimit në regjistrin tregtar të Republikës së Shqipërisë;

b) listën e operatorëve në sistemin e tyre të kontrollit në momentin e paraqitjes së kërkesës;

c) llojin e aktivitetit dhe kategoritë e produkteve që janë objekt i sistemit të tyre të kontrollit dhe certifikimit.

4. Në përjashtim nga legjislacioni në fuqi për kontrollin zyrtar, ministria i cakton një trupe kontrolli detyrat në lidhje me vendimin mbi veprimet që merren në rast të konstatimit të mospërputhjeve me kërkesat e këtij ligji.

5. Trupat e kontrollit nuk kryejnë detyrat lidhur me:

a) mbikëqyrjen dhe auditimin e trupave të tjera të kontrollit;

b) kompetencat për të miratuar përjashtimet nga rregullat e prodhimit, përveç përjashtimit për përdorimin e materialit mbjellës dhe shumëzues bimor jo biologjik;

- c) pranimin e kërkesave për regjistrim të aktivitetit të operatorëve ose grup operatorëve.
 - d) vlerësimin e riskut për mundësinë e ndodhjes së mospërputhjeve me kërkesat e këtij ligji që përcaktojnë shpeshësinë e kontrolleve fizike në pikat e inspektimeve kufitare të ngarkesave të produkteve biologjike para lëshimit për vendosje në treg.
 - e) krijimin e katalogut të përbashkët të masave të përcaktuar në pikën 4, të nenit 43 të këtij ligji.
6. Kushtet e tjera dhe procedurat për miratimin dhe mbikqyerjen e trupave të kontrollit, si dhe regjistrimin e trupave të kontrollit që veprojnë sipas standarteve të tjera nga ky ligj, përcaktohen me vendim të Këshillit të Ministrave.
7. Tarifat për miratimin e trupave të kontrollit, regjistrimin e trupave që operojnë sipas standarteve të tjera dhe tarifat për regjistrimin e aktivitetit nga operatorët, miratohen me udhëzim të përbashkët të ministrit përgjegjës për bujqësinë dhe ministrit përgjegjës për financat.
8. Rregullat e hollësishme për hartimin dhe zbatimin e katalogut të përbashkët të masave, miratohen me udhëzim të Ministrit.

Neni 46

Komisioni për prodhimin biologjik

1. Në Ministri ngrihet dhe funksionon Komisioni për Prodhimin Biologjik në vijim KPB, përgjegjës për miratimin, rinovimin, shfuqizimin e miratimit dhe mbikqyerjen e trupave të kontrollit që certifikojnë sipas kërkesave të këtij ligji, si dhe regjistrimin ose rregjistrimin e trupave të kontrollit që operojnë sipas standarteve të tjera.
2. Përbërja, funksionimi, organizimi dhe detyrat e KPB-së përcaktohen me vendim të Këshillit të Ministrave.

Neni 47

Mbikqyerja e trupave të kontrollit

1. Në ministri ngrihet struktura për prodhimin biologjik, e cila kryen edhe mbikqyerjen e trupave të kontrollit për llogari të KPB-së dhe i raporton atij.
2. Struktura përgjegjëse për prodhimin biologjik mbikqyr trupat e kontrollit të miratuara, për të verifikuar nëse detyrat e caktuara kryhen në mënyrë efektive, të pavarur dhe objektive, veçanërisht për sa i përket intensitetit dhe shpeshësisë së kontrolleve zyrtare.
3. Auditimi i trupave të kontrollit në zbatim të legjislationit për kontrollin zyrtar, kryhet të paktën një herë në vit, duke shmangur mbivendosjet dhe duke marrë parasysh fushën e akreditimit.
4. Ministria siguron se informacionet e marra nga trupat e kontrollit në përputhje me legjislationin në fuqi për kontrollin zyrtar dhe masat e zbatuara nga trupat e kontrollit në rast mospërputhje të konstatuar ose të dyshuar, përdoren për të mbikëqyruar aktivitetet e këtyre trupave të kontrollit.

Neni 48

Masat e shfuqizimit ndaj trupave të kontrollit

1. Ministria, shfuqizon tërësisht ose pjesërisht miratimin e trupave të kontrollit në përputhje me legjislacionin në fuqi për kontrollin zyrtar kur:
 - a) provohet që trupa e kontrollit nuk kryen siç duhet detyrat që i janë caktuar në këtë ligj;
 - b) trupa e kontrollit nuk merr masat e duhura dhe në kohë për të korrigjuar mangësitë e identifikuar; ose
 - c) pavarësia ose paanshmëria e trupës së kontrollit është cënuar/komprometuar;
2. Ministria shfuqizon miratimin e një trupe kontrolli edhe për arsye të tjera nga ato të përcaktuara në pikën 1.
3. Kur Ministria ka shfuqizuar tërësisht ose pjesërisht miratimin e trupave të kontrollit, në përputhje me legjislacionin në fuqi për kontrollin zyrtar, KPБ vendos mbi vlefshmërinë e certifikatave të lëshuara nga trupat e kontrollit përpara datës së këtij shfuqizimi dhe i njofton operatorët për këtë vendim.

Neni 49

Masat e pezullimit të trupave të kontrollit

1. Para shfuqizimit të miratimit, ministria mund të pezullojë plotësisht ose pjesërisht miratimin e trupës së kontrollit:
 - a) për një periudhë jo më shumë se 12 muaj, gjatë së cilës trupa e kontrollit duhet të korrigjojë mangësitë e gjetura gjatë auditimit dhe inspektimit;
 - b) për periudhën gjatë së cilës akreditimi, është pezulluar, në përputhje me legjislacionin në fuqi për kontrollin zyrtar.
2. Kur pezullohet miratimi, trupat e kontrollit nuk lëshojnë certifikata zyrtare për fushën e pezulluar. KPБ vendos mbi vlefshmërinë e certifikatave të lëshuara nga trupat e kontrollit përpara datës së këtij pezullimi dhe informon operatorët për vendimin.
3. Pa cënuar kërkesat e legjislacionit në fuqi për kontrollin zyrtar, ministria heq pezullimin e miratimit të trupës së kontrollit, kur trupa e kontrollit korrigjon mangësitë ose mospërputhjet e dyshuara ose menjëherë pas heqjes së pezullimit të akreditimit nga organi i akreditimit.

Neni 50

Informacionet që paraqiten nga trupat e kontrollit

1. Trupat e kontrollit të miratuara dhe regjistruara, përveç informacioneve sipas legjislacionit në fuqi për kontrollin zyrtar, paraqesin në Ministri:
 - a) listën e operatorëve në sistemin e tyre të kontrollit, brenda datës 31 janar të çdo viti, për vitin paraardhës.

b) të gjithë informacionin statistikor në lidhje me operatorët biologjikë nën kontrollin e tyre sipas formateve të miratuara, deri me 31 Mars të cdo viti dhe sa herë kërkohet.

c) Deri më 31 mars të cdo viti, raportin vjetor mbi kontrollet zyrtare të kryera gjatë vitit paraardhës, si rastet e kontaminimit me produkte ose substanca të pa lejuara.

2. Modeli dhe përmbajtja, e raportit vjetor dhe formateve të të dhënave statistikore për prodhimin biologjik, miratohen me urdhër të ministrit.

Neni 51

Masat në rast të mospërputhjeve të dyshuara

1. Kur Ministria, AKU ose trupa e kontrollit, dyshon ose merr informacion, përfshirë informacionin nga autoritete kontrolli ose trupa kontrolli të tjera, se një operator përdor ose vendos në treg një produkt i cili nuk është në përputhje me rregullat e përcaktuara në këtë ligj, por përmban terma të cilat i referohen prodhimit biologjik, ose kur trupa e kontrollit informohet nga një operator për një dyshim për mospërputhje:

a) kryen menjëherë një hetim zyrtar për të verifikuar përputhshmërinë me këtë ligj. Ky hetim përfundon sa më shpejt të jetë e mundur, duke marrë parasysh jetëgjatësinë e produktit dhe kompleksitetin e rastit;

b) ndalon përkohësisht vendosjen në treg të produkteve me referencë biologjik ose në kalim dhe përdorimin e tyre në prodhimin biologjik, në pritje të rezultateve të hetimit zyrtar. Para marrjes së një vendimi të tillë, trupa e kontrollit i jep operatorit mundësinë për të paraqitur mendimin e tij.

2. Në rast se rezultatet e hetimit zyrtar nuk tregojnë ndonjë mospërputhje që ndikon në integritetin e produkteve biologjike ose në kalim, operatori lejohet t'i përdorë këto produkte ose t'i vendosë në treg si produkte biologjike ose në kalim.

3. Ministria merr masa administrative dhe sanksionet e nevojshme sipas legjislacionit penal në fuqi për mashtrimin me ushqimin, për të parandaluar përdorimin e termave të përcaktuara në Kreun V me qëllim mashtrimi, përfshirë vendosjen e gjobave të parashikuara në piken 1, të nenit 57 të këtij ligji.

Neni 52

Masat në rast të mospërputhjeve që çënojnë integritetin biologjik

1. Në rast të mospërputhshjeve që çënojnë integritetin e produkteve biologjike ose në kalim në çdo fazë të prodhimit, përgatitjes dhe shpërndarjes, si rasti i përdorimit të produkteve, substancave ose teknikave të palejuara në prodhimin biologjik ose shkëmbimit të produkteve biologjike me ato jo biologjike, ministria, AKU, ose trupa e kontrollit:

- a) marrin çdo veprim të nevojshëm për të përcaktuar origjinën dhe shtrirjen e mospërputhjes dhe për të përcaktuar përgjegjësitë e operatorit;
 - b) marrin masat e duhura për të siguruar që operatori të korrigjojë mospërputhjen dhe të parandalojë shfaqjet e mëtejshme të një mospërputhje të tillë;
 - c) sigurojnë që në etiketimin dhe reklamën e gjithë lotit të prodhimit në fjalë nuk vendoset asnjë referencë për prodhimin biologjik.
2. Në rast kur mospërputhjet që çenojnë integritetin biologjik, përsëriten në vazhdimësi, ministria, AKU, dhe trupat e kontrollit sigurojnë që përveç masave të përcaktuara në pikën 1, të këtij neni, operatorët ose grupet e operatorëve, ndalohen të tregtojnë produkte me terma të prodhimit biologjik për një periudhë të caktuar dhe certifikata zyrtare e tyre, pezullohet ose revokohet, sipas rastit.

Neni 53

Rregulla për shkëmbimin e informacionit

1. Përvec detyrimit të përcaktuar në legjislacionin në fuqi për kontrollet zyrtare, autoritetet kompetente shkëmbejnë menjëherë informacion me autoritetet kompetente të vendeve të tjera, për një dyshim për mospërputhje që çënon integritetin e produkteve biologjike ose në kalim.
2. Në rastet kur dyshohet ose konstatohet mospërputhje në produktet nën kontrollin e një trupe tjetër kontrolli, atëherë kjo trupë njoftohet menjëherë.
3. Me marrjen e një kërkesë për informacion, e cila justifikohet nga nevoja për të siguruar se një produkt është prodhuar në përputhje me këtë ligj, trupat e kontrollit shkëmbejnë informacion mbi rezultatet e kontrolleve të tyre me Minsitrinë.
4. Ministria shkëmben informacione mbi mbikëqyrjen e trupave të kontrollit me institucionin kombëtar të akreditimit.
5. Ministria merr masat e duhura për të siguruar që informacionet mbi rezultatet e kontrolleve t'i komunikohen agjensisë së pagesave në përputhje me nevojat e saj.
6. Rregulla të hollësishme lidhur me informacionet që shkëmbehen nga autoritetet kompetente, për kontrollet zyrtare dhe aktivitetet e tjera zyrtare, marrësit e informacioneve dhe procedurat me të cilat duhet të jepet ky informacion, miratohen me urdhër të ministrit

KREU VII

RREGULLAT E TREGTIMIT ME VENDET E TJERA

Neni 54

Eksporti i produkteve biologjike

1. Një produkt eksportohet nga Shqipëria si produkt biologjik dhe mund të mbajë logon kombëtare për prodhimin biologjik, nëse plotëson të paktën rregullat e përcaktuara në këtë ligj dhe kushtet e vendit ku eksportohet.

2. Eksportuesi duhet të regjistrojë aktivitetin në përputhje me pikën 1, të nenit 35, të këtij ligji.

Neni 55

Kushtet e importit të produkteve biologjike dhe në kalim

Një produkt importohet nga një vend anëtar i BE-së ose një vend i tretë, për tu vendosur në tregun shqiptar si produkt biologjik ose në kalim, me kusht që:

1. Produkti përfshihet në fushën e zbatimit të këtij ligji; dhe

2. Përmbush një nga kushtet si mëposhtë:

a) produkti vjen nga vendet anëtare të BE-së dhe shoqërohet me certifikatën e operatorit e cila konfirmon se produkti është në përputhje me Rregulloren Europiane për prodhimin biologjik.

b) produkti vjen nga një vend i tretë, dhe është në përputhje me kërkesat e përcaktuara në Kreun II, III, IV dhe V të këtij ligji dhe të gjithë operatorët dhe grupet e operatorëve, përfshirë eksportuesit në vendin e tretë, i janë nënshtuar kontrolleve nga trupat e kontrollit ose autoritetet e kontrollit të njohura nga Komisioni Evropian si ekuivalente ose të përputhura, për importin e produkteve biologjike në BE, dhe këto trupa kontrolli kanë pajisur të gjithë këta operatorë, grupe të operatorëve dhe eksportues me një certifikatë ku vërtetohet se ata janë në përputhje me Rregulloren Europiane për prodhimin organik dhe ngarkesa shoqërohet me certifikatën e inspektimit.

c) në rastet kur produkti vjen nga një vend i tretë, i cili është njohur si ekuivalent ose në përputhje, me marrëveshje tregtare me BE, për importin e produkteve biologjike në Bashkimin Evropian, dhe produkti përputhet me rregullat e prodhimit dhe kontrollit të atij vendi të tretë, të cilat janë ekuivalente me këtë ligj, dhe importohet me një certifikatë inspektimi të lëshuar nga autoritetet kompetente, autoritetet e kontrollit ose trupat e kontrollit të vendit të tretë.

d) në rastet kur produkti vjen nga një vend i tretë, i cili është i njohur si ekuivalent nga Shqipëria, nëpërmjet një marrëveshje tregtare, që ka një sistem prodhimi biologjik i cili plotëson të njëjtat objektiva dhe parime dhe zbaton rregulla që sigurojnë të njëjtin nivel përputhshmërie me këtë ligj.

3. Operatorët e vendeve anëtare të BE-së ose të një vendi të tretë, i japin në çdo kohë importuesve, AKU-së dhe autoriteteve kompetente të vendeve të treta, informacionet për identifikimin e furnizuesve të tyre dhe të autoriteteve të kontrollit ose trupave të kontrollit të furnizuesve të tyre, në mënyrë që të sigurohet gjurmueshmëria e produktit biologjik ose në kalim. Këto informacione ju vihen në dispozicion edhe trupave të kontrollit të importuesve.

Neni 56

Kontrolli i produkteve të importuara

1. Kontrolli i përputhshmërisë me kushtet dhe masat për importin e produkteve biologjike dhe në kalim, kryhet nga AKU dhe autoriteti doganor, në pikat e inspektimit kufitar.
2. Frekuenca e kontrolleve fizike të produkteve të importuara, varet nga mundësia për mospërputhje.
3. Autoriteti doganor paraqet në Ministri, një raport vjetor për produktet biologjike të eksportuara dhe importuara, deri më 31 mars të çdo viti, për vitin paraardhës. Raporti përmban vendin ku eksportohet ose importohet, emrin e eksportuesit ose importuesit, kategorinë, sasinë dhe vlerën e produkteve biologjike të eksportuara ose të importuara.
4. Rregulla të hollësishme lidhur me kushtet, masat dhe kontrollet e ngarkesave të produkteve biologjike ose në kalim të importuara, përcaktohen me vendim të Këshillit të Ministrave.

Neni 57

Kundërvajtjet administrative

1. Përdorimi i treguesve dhe termave të përcaktuara në nenin 29 të këtij ligji, me qëllim mashtrimi, ndëshkohet nga AKU me gjobë në masën 10 000 deri në 50 000 lekë.
2. Mos regjistrimi i aktivitetit nga operatori ose grup operatori, sipas nenit 35 të këtij ligji, ndëshkohet nga AKU me gjobë në masën 10 000 deri në 50 000 lekë.
3. Ushtrimi i aktivitetit të trupave të kontrollit pa regjistruar ose miratuar aktivitetin sipas nenit 45 të këtij ligji, ndëshkohet nga AKU me gjobë në masën 300 000 deri në 500 000 lekë.

KREU VIII

DISPOZITA KALIMTARE DHE TË FUNDIT

Neni 58

Aktet nënligjore

1. Këshilli i Ministrave miraton aktet nënligjore të parashikuara në nenet 25 pika 5, 34 pika 7, 45 pika 6, 46 pika 2 dhe 56 pika 4 të këtij ligji.
2. Ministri miraton aktet nënligjore të parashikuar në nenet 2 pika 1 shkronja d, 9 pika 14, 10 pika 5, 12 pika 10, 13 pika 5, 14 pika 3, 15 pika 5, 16 pika 6, 17 pika 3, 18 pika 4, 19 pika 2, 20 pika 5, 21 pika 3, 22 pika 4, 22 pika 9, 23 pika 3, 24 pika 5, 28 pika 7, 31 pika 6, 37 pika 5, 38 pika 7, 39 pika 6, 43 pika 5, 44 pika 3, 45 pika 8, 50 pika 2 dhe 53 pika 6, të këtij ligji.

3. Ministri përgjegjës për Bujqësinë dhe Ministri përgjegjës për financat miratojnë udhëzimin e përbashkë parashikuar në pikën 7 të nenit 45 të këtij ligji.

Neni 59

Dispozita kalimtare

1. KPB i ngritur dhe organizuar në përputhje me parashikimet e Ligjit nr. 106/2016 “Për Prodhimin Biologjik, Etiketimin e Produkteve Biologjike dhe Kontrollin e tyre” vazhdon veprimtarinë deri në ngritjen dhe organizimin e Komisionit sipas parashikimeve të këtij ligji.
2. Operatorët dhe trupat e kontrollit ndjekin procedurat e regjistrimit të aktivitetit dhe të miratimit pranë KPB sipas parashikimeve të Ligjit nr.106/2016 “Për prodhimin biologjik, etiketimin e produkteve biologjike dhe kontrollin e tyre” deri në miratimin e akteve nënligjore të përcaktuara në nenet 37 pika 5 dhe 45 pika 6, të këtij ligji.

Neni 60

Shfuqizime

1. Ligji nr. 106/2016 “Për Prodhimin Biologjik, Etiketimin e Produkteve Biologjike dhe Kontrollin e tyre” shfuqizohet me hyrjen në fuqi të këtij ligji.
2. Aktet nënligjore të nxjerra në zbatim të Ligjit nr. 106/2016 “Për Prodhimin Biologjik, Etiketimin e Produkteve Biologjike dhe Kontrollin e tyre”, për aq sa nuk bien në kundërshtim me parashikimet e këtij ligji, zbatohen deri në nxjerrjen e akteve të reja nënligjore sipas këtij ligji.

Ky ligj hyn në fuqi 15 ditë pas botimit të tij në Fletoren Zyrtare.